

## PAAVORO ITIONCAJIAQUENERI

### IROMAQUITICA

#### Antsatantaquemparoca

Ocatica iroguenti antsatantaquemparoca itioncacaantaqueca Paavoro itioncajianquenerigueti tsarotentajiacarica Jesoshi choocajianquitsica guinteninintsiqui pajitatsica Iroma. Iriraquea Paavoro iriovetaca jorio, cotanquitsi irio itigarancane Jesoshi tsavetantimojiaquerica teeca irijorijoigueji itsavetantimojiaqueri Quenquetsatsarentsi Oganejencatatsica, teetarite inquemisantajigueroji jorio itsavetantimojiavetacanicarica. Irocashi itioncacotaqueri irira Paavoro otsipaqui paperiqui (Ya. 7.57–8.1; 9.1-31; 13.1–28.31). Itioncacotaqueri ichooaquegueti Iromaqui otsapapaequi Ya. 28.14-31. Tequeratagueti intioncacaaneroji Paavoro ocatica itioncacaanquero otsipapae mavite paperi itioncajianqueneri Tesaronicaquitica, aisa otsipa mavite paperi itioncajianquenerica Corintoquitica, otsipa paperi itioncajianquenerica choocajianquitsica provinciaqui pajitatsica Garashia. Coajica icamantaqueri Tereshio intionquero ocatica paperi intioncajianqueneri choocajianquitsica Iromaqui (16.22). Paavoro icantaqueri Tereshio maasano intioncaqueca ocانىqui ocatica paperiqui. Itioncacaanquero ajagantsiniqui irooca 56 irooca 57, otsipatapojacagueti iquenaguetanaquegueti quepatsipaequi itsavetantavaequerigueti Jesoquirishito. Itioncacaantaquerogueti Paavoro ocatica paperi iquenquejajitaque ichooaque Corintoqui irooca otsipaqui guinteninintsi choocatanquitsica quepatsiqui pajitatsica Guereshia.

Ocانىqui paperiqui itioncacaantaqueca Paavoro itsatacaajiacaji maasano aatimpajia caquinteja yamenajiacaji Aapani Irioshi chooca antaqueca icantimentantaqueca iriatimpa. Irirampani Jesoquirishito yamenaqueri Aapani Irioshi teequea inquempevaetimatempaji. Itsatacaacaji quericaca aventuraquemparicane Jesoquirishito metojaventajiacajica iramenaqueri Aapani Irioshi quejetaca tee inquempevaetimatempaji. Itsatacaajiacaji quero ancojiaquempani aatimpajia quemisantajiaquerica Jesoshi anchoocajiaqueniji cameetsa, anetsanaguetaqueroniji inintaguetica Aapani Irioshi yamitacojiajigueti Ishire.

---

**1** <sup>1</sup>Naroguenti Paavoro tionca-  
quempica, iriguenti ashinquena  
Jesoquirishito, icajemashirenta-

quena nompeaquempa itigarancane,  
inintacaaquenaquea nontsavetantero  
Quenquetsatsarentsi Oganejencata-

tsica<sup>a</sup> itigarancaqueca Aapani Irioshi. <sup>2</sup>Oraticaquea Quenquetsatsarensi Oganejencatatsica irootaquequea icantsitacaca coramani itioncacaquerigueti tsavetantajia-tsica tioncaqueroa Tioncarensi Iroomajatatsica. <sup>3</sup>Iriguenti icanta-coque Irijanite Aapani Irioshi, iriotari Amajirote Jesoquirishito. Oraquea icaquintetapojaquegueti, iriguenti choviquivaetanaqueri majiromantsica Taavini. <sup>4</sup>Ariquea imetojavecagueti Amajirote Jesoquirishito manaquea ipochatanaji, yonigaantantacaroca iriguenti Irijanite Aapani Irioshi, aisa irooquea itsatantajitacaroca iriguenti caaviji yagavejamajati, yonigaantaqueriquea Ishire Iriomajaca. <sup>5</sup>Iriquea Aapani Irioshi icavintsajamajajiaqueanaquea, inintacaantajiaquenaca Jesoquirishito nompeajiaquempaqua itigarancane nontsavetantimojia-queri maasano caquinteguetatsica cameetsaniji inchoocagarantajiaqueni-aventaventaquemparineca Aapani Irioshi tsaromentajiaquemparineca irinetsanantajiaquemparoca icanquerica. <sup>6</sup>Ariqueate iquempetacajiaquempiquea aviatimpajia inintacajiaquempi Aapani Irioshi irashintajiaquempiquea Jesoquirishito.

<sup>7</sup>Nontioncajiaquempiquea aviatimpajia guintenijiatsica oraniqui Iromaqui, ipintsajiacaca Aapani Irioshi icajemantajiaquempica pimpeajiaquempiniji igomajamajare.

Namanacoventajiaquempiquea incavintsajajiaquempinijite Aapanite

Irioshi aisa Amajirote Jesoquirishito, inchoocatacaajiaquempinijite cameetsa aatonijite pishoshoventajigaro taaca opajitapae.

#### Inintaveca Paavoro iroanaquemequeate Iromaquiniqui

<sup>8</sup>Imaica iroquetitaquea noninque noncamanquempi, querocagueti quepatsipaequi itsavetacojiquempiquea aviatimpajia caaviji pitsaromentajia-anacari Aapani Irioshi. Irootaquequea nariotelesatantancarica Aapani Irioshi, iriotaquequea agavejacaquenaca Jesoquirishito noquempetancaroca imaica. <sup>9</sup>Yamenaquenaqueate Aapani Irioshi nocantacoguitani namanacoventajiaquempiquea, aparo iriatimpa nosavicaventaquequea, nontsavetanta-queru Quenquetsatsarensi Oganejencatatsica tsavetacoquerica Irijanite. <sup>10</sup>Oraqueate namanacoventajiguimpigueti nocanqueri Aapani Irioshi iriogueti nintanquitsine intigarancaquenaqueate noanaquequea oraniqui aviatimpajiaqui namenajiajatempi. <sup>11</sup>Noninquequea namenajiajatempi namitacojiaquempiniji pishirequi pintampishishiretantamajajianaquem-paca. <sup>12</sup>Teequea ariqueate noncanteji aparo nontsatacaajiaquempiquea naatimpa, iroguenti nocanque noninque antampishitavacaajiaquempaqua aatimpajia, ariqueate aquejetavacaajiacatsaromentajiacarigueti.

<sup>13</sup>Napitsaromentarijiateni, noncamanquempi nopintsapintsavecaqueate namenajiajatempimequea, cotanquitsiquea teequa nagavejeji noncoraqueteji arejevaetanaca imaica. Iroguenti nopintsatashivetaca nontsavetantimojia-

---

**a 1.1** *Quenquetsatsarensi Oganejencatatsica.* Irootarite tsavetantaquerica Jesoshi Irijanite Aapani Irioshi, shetacoshirentajiaquerineca maasano coguisherijia aventaventaquemparineca.

quitempi pimpishivoroquijacoshirentimentanaquempanijite pinquempetantajianaquemparica guinteniguetsatsica osamanipaequitica notsavetantimojiaquerigueti. <sup>14</sup>Iniquequeate Aapani Irioshi nontsavetantimojiaqueriquea maasano, irioca guiriego irioca teeca iriguiriegote, irioca tsavaetatsica irioca teeca intsavaeteji, namenajiaqueritarite inchoocataetajate tsavetantimotaquerineca. <sup>15</sup>Irootaquequea nonintantacaca noncoraquetaquequea nontsavetantimojiaquempiqueate aviatimpajia guintenijsatsica oraniqui Iromaquiniqui, nontsatacajaiaquempiro Quenquetsatsarentsi Oganejencatatsica.

**Agavejica Quenquetsatsarentsi  
Oganejencatatsica**

<sup>16</sup>Teequea nompashiventacaguempaparoji Quenquetsatsarentsi Oganejencatatsica tsavetantaquerica Jesoquirishito, iroguentitarite iragavejane Aapani Irioshi irimeshiantajiaquemparica maasano aventaventaiquemparineca. Iriquetitaquea intsavetantimojitaquequea joriojia, iroompaquea inquempetsijiguempariquea teeca irijorijoigueji. <sup>17</sup>Oritacaquea Quenquetsatsarentsimajaca otsatacaajiacaji quero icota Aapani Irioshi icomajashirentacajaarigueti caquinteja. Iriguenti icomajatacajaijaa irirajia aventaventajiacarica aisa nintanajatsiquea yaventajiacari. Ariquea ocanque itioncajiquea: “Iriaquea comajashirentanquitsica incoquempani inchoocaguiteni irooriji yaventaguitarini Aapani Irioshi.”<sup>b</sup>

**Aapani Irioshi icatsimajiaqueri  
covaeguishejatsica**

<sup>18</sup>Iriaquea Aapani Irioshi choocata-tsica inquitequi yonigaantacaro

igatsimare, icatsimamajatiriquea maasano teeca intsarorentempariji aisa maasano peacaaguishejiacaroca covaeguisherentsipae. Iriatimpajia iticaaqueroquea iroomajatatsica, iticaantavacaro igovaeguishere. <sup>19</sup>Choo-caguetaquetarite iragavejaqueca caquinte intsaguetaque quero icoguetani Aapani Irioshi, ariquea itsajavecaroquea iriatimpajia, inchiquiojita yoguiconijataqueneri iriatimpa. <sup>20</sup>Aatimpajia teequea amenajiavetempariji Aapani Irioshi, cotanquitsiquea oraquateate yamenajigueti rogueti maasanopae ipeacaaguecaca paesatoniqui iroaquera-gueti ipeacaacarogueti quepatsi aisa maasanopae choocantaguetaroca, ariquea iroguenti itsajiquero iriguenti Irioshimajaca caavijica yagavejamajati, incoguitempani iragavejaguíteni, jero aatoquea queri agavejatsi incantamajate: “Naatimpa teequea nontsateroji.” <sup>21</sup>Itsajavecashinete chooca Irioshi, cotanquitsiquea teetari intsarorentempariji, teetarite incanteriji: “Arioteesaa”, iroguenti iquenquejaguishevaequero covaeguisherentsi, jero teeca intsatimajigueji, quejetacaquea ipitsecashirentacojianaque. <sup>22</sup>Icantajavecaquea: “Notsamajajigui”, cotanquitsiquea teequea intsajigueji. <sup>23</sup>Yovashiantaqueri iroganejicare Irioshimajaca icocanica ichoocati, iriguenti ishineventajiaja irioshivijijiacaca intati ipeacaacaca iriatimpajia, iquejetacaavevari caquinte teeca inquishometojaneteji, iquejetacaavevari aisa quejcarica araguetatsica, canaaguetatsica, soancaaguetatsica.

<sup>24</sup>Irootaquequea iticaarejantanacaca Aapani Irioshi impeacaaguishejiguempapota taaca inintaguishejiaqueca iriatimpajia, ariquea yaagavacaajianaca

impashiventacaaquemameca.

<sup>25</sup>Teequea inquemisantajigueroji  
iroomajaca quenampojarica  
Irioshimajacaqui, manaquea ipiacaanta-  
jaro amataaronsi. Itsarovensijiavetari-  
quea ipeacaajicaca, ishineventaguitarini,  
teequea intsaromentajiguempariji  
Peacaavecarica. Cotanquitsiquea  
iriatimpa ancoguitempani ashineventa-  
guitemparini ancantajiaqueriquea:  
“Caaviji pogajejencamajata.” Ari  
oncoquempa.

<sup>26</sup>Irootaquequea iticaarejantanacaca  
Aapani Irioshi impeacaaguishejiguem-  
parota inintaguisheguetaqueca impashi-  
ventacaaquemameca. Oraquea  
manquigarentsijia teequea onintajiajeji  
irimanquigatajemparoji shirampari,  
manaquea onintaguishtavacaajianaca  
apimanquigarojiate. <sup>27</sup>Ariquee iquempe-  
jiaca shiramparijia teequea irinintajia-  
jeji irimanquigatajemparoji manquiga-  
rentsi, manaquea yaagavacaajianaca  
irapishiramparijiate opeacojianaqueri-  
quea itiontare. Inchiqiojita iquempe-  
taantajiaquea iriatimpajia yatsipetan-  
tajiaca iroorijite ipeacaaguishejianacaro  
ovashiventajantaguetatsica.

<sup>28</sup>Teequea irinintajigueji inquenqueja-  
cojiajeriji Aapani Irioshi, irootaquequea  
iticaarejantanacaca inquenquejaguishe-  
jianaquero tiontarentsijencani ipeaca-  
aguishejianacaroquea covaeguisherentsi.  
<sup>29</sup>Iroguenti isavicaventajiaque cantashi-  
tatiaguishejencatatsica: ipeacaaguisheji-  
anacaroquea tiontarentsijencapae,  
inantsiguesqueriquea irashijiapae  
itsipapae, itsipatacaantavacaro  
covaeguisherentsi, icatsimatacotan-  
taque, imetojantajiaque, icatsimatantaji-  
aque, yamatavijantajigui, iquenashivae-  
pojaca intati, aisa icantaguishtecojia-  
queri igonorjia. <sup>30</sup>Itsojeventajiacari  
itsipapae, isemajiacari Aapani Irioshi,  
caaviji ipigatsatanta, yamenajiaque

caaviji yanaajencavaeque, yaventajia-  
caro maasanopae itsanirore. Yaaguishe-  
tashiguetaquea impeacaaguishejia-  
quemameca. Teequea inquemisantajigue-  
riji irijanintajiacarica. <sup>31</sup>Tee irinintaji-  
gueji intsajiaque, tee irinetsanajigueroji  
icanqueca, tee impintsatantajiguempaji,  
tee impeacotantempaji, tee impintsata-  
cotantempaji. <sup>32</sup>Itsajiavecaroquea  
icanque Aapani Irioshi quericaca  
quempetanquitsineca imaica irimetoja-  
quegueti iroanaque camorecariqui,  
cotanquitsiquea iriatimpajia teequea  
inquemajigueji, arimpaquea yogaajia-  
naca ipeacaaguishejianacaroquea  
covaeguisherentsi, yogavitsitaroquea  
ishineventajiacari yamenajiaquerigueti  
itsipajia ipeacaaguishevaetacarogueti  
covaeguisherentsi.

#### Aapani Irioshi teequea incatsimatantashitempaji intati

**2** <sup>1</sup>Piconoagarantajiaquea aviatim-  
pajia manaquea picantajiaque  
cameetsavaeque incatsimamajajiqueri-  
quea quempejiaqueroca imaica.  
Iintsijate pamenajiguejate intati.  
Oraquea picantajiaquegueti imaica  
aviguentiquea quempetacaantajanqui-  
tsica, pipeacaaguishejiacarotari aviatim-  
pajia aisa ipeacaaguishejiaca  
iriatimpajia. ¿Arimpate quero pincojia-  
querini Aapani Irioshi aatonijite  
icatsimajiguiempiti? <sup>2</sup>Oraquea icanque-  
gueti Aapani Irioshi incatsimajiaqueri  
quempeguequeroca imaica, itsamajaji-  
quero manaquea ipeacaaguishejiacar-  
quea covaeguisherentsi, teatarite  
incatsimatantashitempaji Aapani Irioshi  
intati, iroomajaca maasano icanqueca.  
<sup>3</sup>Aviatimpajia picantajiaque incatsima-  
jiqueriquea quempeguequeroca imaica,  
cotanquitsiquea irooriji piquejejavaca  
pipeacaaguishejianacaroquea quempe-  
guetaroca ipeacaaguishejiaca

iriatimpajia, ¿arimpate quero pincojia-  
quempani aatonijite icatsimajiguimpitsi  
Aapani Irioshi? <sup>4</sup>Jmm aricajate  
pimanintavaquero igavintsajare  
icavintsajantantamajatigueti, aisa  
yatsipetacojiaquempiqueti, pamenaji-  
aque tequerata incatsimajiguempi.  
¿Arimpate teequea pintsajigueji  
manaquea icavintsajajiaquempi  
cameetsaniji povashiantajianajeroniji  
pipeacaaguishejiacaca pincantashitati-  
jaianajempaja? <sup>5</sup>Cotanquitsiquea  
piquishoshirentajiaque, aisa teequea  
pinintajiguenica povashiantajigueroji  
pipeacaaguishejiacaca cameetsaniji  
pincantashitatijaianajempaniji. Arimpa-  
queate picovaeguishejianaca, teequea  
pinquenquejajigueroji oncoramanitapo-  
jajegueti arejetapojaquemparogueti  
incatsimatantajiaquemparica Aapani  
Irioshi caquinteja, caaviji irogaamajaji-  
aquempiquea incatsimajiaquempi,  
pinquejetacaantajiaquempa. Irraquea  
Aapani Irioshi incantamajajiaqueri  
maasano querocaca icojiaacani.  
<sup>6</sup>Iriatimpa itsamajatiroquea ipeacaagui-  
shejiacaca maasano, aisa itsamajatiro  
cameetsaguetatsica ipeacaaguetacaca  
maasano, incantantaquemparica quero  
incojiquerini. <sup>7</sup>Iconoagarantajia  
caquinte icantacotacaaguitarini icomaja-  
majaca, irooriji inintajiaque iroganejen-  
catacaavajempari Aapani Irioshi,  
irishineventajiajavempari inquitequi,  
incoguitempani iranijaguiteni. Maasano  
quempejiatsica imaica incantajiaqueri  
Aapani Irioshi incoquempani inchooca-  
jiaque iriatimpaqui. <sup>8</sup>Cotanquitsiquea  
caaviji incatsimamajajiaqueriquea  
maasano iroguentigueti irisavicaventa-  
jigue taaca inintajiguica iriatimpajia,  
maasano teeca irinintajigueji inquemi-  
santajigueroji iroomajatatsica,  
manaquea ipeacaaguishejiacarouea  
covaeguisherentsi. <sup>9</sup>Irantsipejiaquempa-

quea incanquempa maasano caquinte  
peacagaroca covaeguisherentsi,  
irishimampojancajiaquempaquate.  
Irantsipejiaquempaquee joriojia,  
iroompaquee inquejetsijianaquempa-  
quee aisa teeca irijorijoigueji. <sup>10</sup>Cotan-  
quitsiquea iriraquea comajamajajiatsica  
iroganejencatacaajiajavempari Aapani  
Irioshi, irishineventajiajavempari  
inquitequi, inchoocamajapojaje  
cameetsa, aatoquea ochoocatimatajitsi  
asereajerineca. Ariquate inquempeta-  
caajiaquempari maasano iriatimpajia,  
joriojia aisa teeca irijorijoigueji.

<sup>11</sup>Aapani Irioshi yamenajiaqueriquea  
caquinteguetatsica iamirincaque, aato  
ichoocatitsi impeacoquempaca.

<sup>12</sup>Maasano covaeguishejiatsica incatsi-  
majiqueri. Irirajia teeca intsajiavetem-  
paroji igantacaantane Aapani Irioshi  
itioncacotanaqueca Moishishini  
incatsimatimentajitaqueriquea iriatimpa  
igovaeguisshere aisa, cotanquitsiquea  
aatotarite icantajiguiritsi Aapani Irioshi:  
“¿Queroquea ocoani teequea pinetsa-  
najigueroji nogantacaantane?” Irraquea  
tsajiavecaroca cotanquitsiquea  
nintanatsi icovaeguishejiaca irioquea  
iriguenti incatsimamajajiaque Aapani  
Irioshi inquenquejacaajiaqueriquea,  
teetarite irinetsanajigueroji. <sup>13</sup>Teenica  
irioquea yamenajiaque Aapani Irioshi  
icomajashirentaca irirajia quemajiajeta-  
roca intati igantacaantane, iriguenti-  
quee incantacojiaque icomajashirentaca  
netsanamajatiroca. <sup>14</sup>Irraquea teeca  
irijorijoigueji teequea intsajiavetempa-  
roji igantacaantane itioncacotanaqueca  
Moishishini, cotanquitsiquea oconoaca-  
queate icomajamajaca iquempetacaajia-  
carouea itioncacojiquerogueti,  
inchiquiojita itsatashijiacarouea  
iriatimpajia. <sup>15</sup>Oraquea iquempejiaca-  
gueti imaica itsajiquero itsajiaquero-  
quee iriatimpajia querocaca

incojiaquempani incomajamajajiaquem-  
pagueti, iriguentiquea tsatacaajiaqueri-  
quea Aapani Irioshi quejetacaquea  
itioncajitiro iguenquejanequi, oconoaca-  
quea iquenquejantajiacaca: “Nocovae-  
guisshetaca”, oconoacaquea aisa  
iquenquejanaque: “Cameetsataque  
nantaquea.”<sup>16</sup> Ariqueate onquempeta-  
naquempa oncoramanitapojajeguete  
arejetapojajempaguete incantantaquem-  
parica Aapani Irioshi Jesoquirishito  
incatsimajiaqueri maasano senacajave-  
caroca ipeacaaguishejiacaca. Irootaque  
ocanque Quenquetsatsarensimajaca  
Oganejencatatsica notsavetanquea.

### Joriojjamajaca

<sup>17</sup>Cotanquitsiquea piconoagarantaca  
picanque: “Naroguenti jorio, aatoquea  
icatsimatanatsi Aapani Irioshi, notsama-  
jatirotarite itioncacotanaquea  
Moishishini.” Manaqueate aisa pisemeti  
pijiiqueji aviguenti ivintsaremajaca  
Aapani Irioshi. <sup>18</sup>Pijivecaji pitsaqueroji  
inintica Aapani Irioshi, aisa pitsatiro-  
quea taaca opaji cameetsatsica irooca  
aisa taaca opaji covaequisshetatsica.  
<sup>19</sup>Aisa pijivecaji caaviji panaaque  
pitsati, jero pinintantacaca pintsataca-  
queriquea teeca intsateji, pijivecaji  
piquejetacari acatsavacotanaquerica  
shamponcajari, pijivecaji piquejetacari  
tsirencacotaquerica pitsecacotatsica.  
<sup>20</sup>Inchiquiojita pipeaca tsatacaantanta-  
tsica pamenaque ariqueate pagavejaque  
pintsatacaajiaqueriquea teeca intsateji  
aisa iriaqueraca tsajiananquitsica taaca  
opajita cameetsaguetatsica aisa taaca  
opajita covaequisheguetatsica, pamen-  
quetarite pitsamajaqueroquea itioncaco-  
tanaquea Moishishini, aisa pamenaque  
irooquea tsatacaaquempironeca  
pintsamajaqueroniji maasanopae taaca  
opajitapae itsavaejitica irooca aisa  
maasanopae iroomajaca. <sup>21</sup>Iriguenti-

quea pitsatacaajianaquequea itsipapae,  
¿ari pitsatacaacampa aviatimpa?  
Ariquea oquempetaca picanque:  
“Teequea oncameetsateji paitsitante-  
guete”, ¿arite paitsitantimpa aviatimpa?  
<sup>22</sup>Irootaquequea picanti aisa: “Teequea  
oncameetsateji poashitirotsi manquiga-  
rentsi”, ¿arite poashitantimpa  
aviatimpa? Ariquea iquempetaca  
ipeajitica irioshivijijitacaca intati,  
irootaquequea pamenaquequeate  
covaequishevaeca, ¿arite paitsitirimpa  
yashintacajaigueta-carica choocagueta-  
tsica iteemporotequi? <sup>23</sup>Pisemetacocaró  
pitsavetarogueti igantacaantane Aapani  
Irioshi itioncacotanaquea Moishishini,  
cotanquitsiquea aatoguete pinetsanatiro  
ocanquea manaquea oquejevetaca  
picantaguisshetacotaqueri Aapani Irioshi.  
<sup>24</sup>Ariquea otioncacaquea ocanque:  
“Irirajia teeca irijorijoiqueji icantagui-  
shejiaqueriquea Aapani Irioshi, aviguen-  
tijiaqueate quempetacaantajiaqueri.”  
<sup>25</sup>Aviatimpajia napijoriojatiene  
pamenajiaque totsaiquijiaquempi  
pichonquimashi pijijiaqueji ariquea  
irishineventajiaquempiquea Aapani  
Irioshi, cotanquitsiquea naatimpa  
noncantajiaquempiquea pinetsanamaja-  
jiaqueroja maasanopae itioncacotana-  
quea Moishishini, ariquea iroguenti  
irishineventajiaquempinijite pitotsaiqui-  
jiacaguete. Oraqueate aatoguete pinetsa-  
najiguirotsi maasano igantacaantane,  
quejetaca teeca intotsaiquijiteroji  
pichonquimashi. <sup>26</sup>Irirajiaquea teeca  
irijorijoiqueji teequea intotsaiquijive-  
tempariji, cotanquitsiquea intampatica-  
terogueti inintaguetica Aapani Irioshi,  
iriatimpa iramenajiaqueri quempeca  
totsaiquijia. <sup>27</sup>Iramenajiqueriguete  
teeca intotsaiquijivetempariji  
cotanquitsi inetsanataquero inintague-  
tica Aapani Irioshi, ariquea onconijavae-  
quequea manaquea piquempetacaanta-

jiaca aviatimpajia totsaiquijjivetanquitsica tsajivecaroca itioncacotanaqueca Moishishini, cotanquitsiquea teequea pinetsanamajajigueroji. <sup>28</sup>Irraquea managueti itotsaiquijjiqueriquea imeshinaqui teequea irio joriomajaca yashintamajatacaca Aapani Irioshi, aisa teequea irishineventempariji Aapani Irioshi iramenaquerigueti mana itotsaiquijjiqueri itsinoqui. <sup>29</sup>Irraquea tsaroyentamajatarica Aapani Irioshi, aisa inetsanamajaqueero icantica, irioquea iriguenti joriomajaca yashintamajatacaca Aapani Irioshi, icantashitati-amajatanajatarari ishirequi, teequea irooquea iraventempaji itotsaiquijjiquerigueti. Teetari irooquea cantashitatiecaajempariji inetsanatirogueti itioncacotanaqueca Moishishini, iriguenti cantashitatiecaajari Ishire Aapani Irioshi. Irraquea quempetiroca imaica ishineventajicari, cotanquitsiquea teequea irioquea shineventajiajemparine caquinteji, iriguentiquea shineventajari Aapani Irioshi.

**3** <sup>1</sup>Irosacanic a itaa opajita ocameetsatantacaca irijorijoitegueti? ¿Taaquea opajita ocameetsatantacaca intotsaiquijjite-rigueti? <sup>2</sup>Oshequiqueate ocameetsavaetan-tacaca. Aatimpajiatari joriojia icavintsajamajajiaqueca Aapani Irioshi. Jeroquea anaavaequeroca maasanopae: yojocacota-caantajiacajiro Iguenquetsatsare cameetsa-niji anquempoguijajiaquero agaajiaqueneri itsipajia. <sup>3</sup>Oraqueate choocagueti teeca irinetsanateroji inintacaaquerica, ¿arimpate iquejeta Aapani Irioshi aato inetsanatiro icanqueca? <sup>4</sup>iAatoshine! Intsojeajivetaquempaqueate maasano caquinteji, cotanquitsiquea Aapani Irioshi aatoquea itsojegatsi, irinetsanamajaquero-quea icanqueca. Ariquea itioncacojitiri-quea cantatsica:<sup>c</sup>

“Iramenajiquempiquea picoguitani pitampaticamajatiro, teequea pintsojeguempaji.

Incantacojivequempigueti chooca pipeacaaguishetacaca, panaantequea iramenajique picomajamajata.”

<sup>5</sup>Oraquea apeacaaguishetagueti covaequisherentsi onigaantavecaroquea icomajamajata Aapani Irioshi, Iriomajaca. Irosacanic, ¿querocaca ancantajigueni imaica? Aricaja ancante: “Irooquea nogovaeguisher nigaanta-queroca icomajamajata Aapani Irioshi, ¿querocaquea ocotacani icatsimatimentantaquenaroca nigaantaqueroca icomajamajata iriatimpa? Teecajate intampaticateroji.” (Irootarite icantica caquinte.) <sup>6</sup>iAatoshinet acantirotsi! Aatomegueti itampaticamajatirome Aapani Irioshi, ¿querocampate incoquempanti intsatantajiaquemparica quepatsiquitica incatsimatimentajigueri igovaeguisher? <sup>7</sup>Aricajate incante nintavetanquitsineca irompetacotana-jempa: “Notsojeagueti irooquea yamenantajitacarica Aapani Irioshi iriguenti tampaticamajatiroca, onquenantanaquempaca intsaroyentan-tajitaquemparica. ¿Quero ocotacani incatsimatimentantaquenaroca Aapani Irioshi notsojeagueti incanque: ‘Irosacanic covaequisher?’” <sup>8</sup>Arimequeate onquempetaquempamequeate, ¿quero ocoani teequea ancantajigueji: “Jaame ampeacaaguishhejiguempajate covaequisherentsi cameetsaniji anigaantajiaque-riniji Aapani Irioshi teequea incovaequishetimatempaji?” Ariqueate chooca cantashijivetsica: “Ari icanque Paavoro, irooquea itsatacaantaque”, manaquea itsojeaca intati. Cameetsata-quequea incatsimatimentajiaqueri

c 3.4 Sar. 51.4. Irraquea Taavini itioncacotanaqueri Aapani Irioshi.

Aapani Irioshi, iriotari quempetacaantajanquitsi.

**Maasano aatimpajia agavejajiacaji covaequisherentsi**

<sup>9</sup>Iroosacanica imaica ¿querocaca ancantajigue? ¿Arica ancantajiguequea aatimpajia joriojia caaviji anaavaequeriquea teeca irijorijoigueji? ¡Aatoshine acantajiguitsi! Aritaque nocantaque incajaranqui, maasanoquea aatimpajia agavejajiacaji covaequisherentsi, iquempejiaca joriojia aisa teeca irijorijoigueji icovaequishejiaca.

<sup>10</sup>Ariquea itioncacojitiroquea, ocanti: “Teequea inchoocatimateji caquinte comajarimajaca teeca incovaequishetimatempaji, tee inchoocateji aparato.

<sup>11</sup>Teequea quericaca tsamajatatsineca, teequea queri nintamajatatsineca intsaqueri Aapani Irioshi.

<sup>12</sup>Maasano itomicapitsajiaqueri, maasanoquea ipomatsajia. Tee inchoocatimateji comajamajantanquitsica, tee inchoocateji aparato.”<sup>d</sup>

<sup>13</sup>“Iquenquetsaguishemajaqueroquea chomisaaromajaca, quejetaca itsano iroome omoro yojoquijitantajitarica metojari. Yamatavijanenetantapinitacaro inene.”<sup>e</sup>

“Iquepigavagantevaetaque iquejetacari camaarini irooriji icantaguishetacoqueri igonorojia.”<sup>f</sup>

<sup>14</sup>“Icantacoguitaniqua icatsimatsajencaguitirini igonorojia, manaquea osotoajencatanaque igatsimajencare.”<sup>g</sup>

<sup>15</sup>“Yamejiacaro iguiti yanijitancaro ishintsitashitanaquero irimeto-

jantajigue oshivaririncajata-naque iriraja.

<sup>16</sup>Querocagueti iquenajiaqueni yatsipetacaajiacariquea itsipapae, ishimampojancaacaguitarini.

<sup>17</sup>Teequea intsajiajeji iraavacaajiajempaji inchoocajiajeji cameetsa.”<sup>h</sup>

<sup>18</sup>“Teequeate intsaroacaajiguempariji Aapani Irioshi.”<sup>i</sup>

<sup>19</sup>Imaicaquea atsajiaque oraquea maasanopae Itioncacaantaquea Aapani Irioshi, itioncaciaqueneriquea irirajia inintacajiaiquea irinetsanajiguero. Itioncacaanqueroquea cameetsaniji irimajeretacaajiaqueriniji maasanojia, iramenajiqueriquea maasano caquinteja teequea irinetsanajigueroji, ariquea incanque Aapani Irioshi quero incojitaquerini maasano. <sup>20</sup>Teequea inchoocateji agavejatsica irinetsanama-jatero maasano Itioncacaajiaquea Aapani Irioshi iroome incantantaquem-pameca Aapani Irioshi: “Iriguenti comajarimajaca, tee incovaequishetimatempaji.” Oraquea itioncacaanquea manaquea otsatacaajiacaji arosacanica covaequisherijia.

**Incomajatacajiaqueri Aapani Irioshi maasano aventajiaquemparineca Jesoquirishito**

<sup>21</sup>Cotanquitsiquea imaica yonigaacajiro Aapani Irioshi quero icotani incomajatacaantaguete. Teequea onquejtemparoji ipanquenajivetaroguete igantacaantane. Yonigaacajica imaica irootaquequea itioncacojiaquea coramani Moishishini aisa itsipajia tsavetantajiatsica. <sup>22</sup>Incomajatacajiaqueri Aapani Irioshi maasano aventajiaquemparineca Jesoquirishito, irioca

d 3.10-12 Sar. 14.1-3; 53.1-3; Eeq. 7.20. e 3.13 Sar. 5.9. f 3.13 Sar. 140.3. g 3.14 Sar. 10.7. h 3.15-17 Is. 59.7-8. i 3.18 Sar. 36.1.



joriojia, irioca teeca irijorijoigueji,  
 iconoacaantajiacari, <sup>23</sup>aritarite  
 icovaeguishejiaca maasano, tee inchoo-  
 cateji moncarateroneca iroganejencare  
 Aapani Irioshi. <sup>24</sup>Cotanquitsiquea  
 iriatimpa icavintsajocjiaqueri itigaranc-  
 aqueri Quirishito Jesoshi imetojaven-  
 tajiaca ariqueate imeshiajiaqueriquea  
 maasano aventajiacarica. Aatimpajia  
 teequea taaca opaji ampeacaajiaquem-  
 paca cameetsaniji irimeshiajiajiniji,  
 inchiqiojita ininque iriatimpa irimeshi-  
 ajiacaji. <sup>25</sup>Paesatoniqui tequeratagueti  
 incoraqueteji Jesoquirishito yamenajia-  
 vecari Aapani Irioshi coramanipaequi-  
 tica covaeguishemajataca, cotanquitsi-  
 quea yatsipetacojiacari itsaquequea  
 irimetojaventajiaqueri oncoramanitapo-  
 jajegueteji Jesoquirishito. Ocoramanipo-  
 jaquegueti inchiqiojita itigarancakeri  
 irantsipeventajiacaji irimetojaven-  
 tajiaca maasano covaeguishejiatsica,  
 ipiapojajaji. Oraquea yompajocjiqueri-  
 gueti ochovincajatanaquequea iriraja  
 aatonijite icatsimajiguiritsi Aapani  
 Irioshi aventajiaquemparineca Jesoqui-  
 rishito incantajiaquegueti: “Arimajasa-  
 canica imetojaventajiaquena.” Ininque-  
 quea Aapani Irioshi intsajiaque maasano  
 teequea quericaca irishetacotantashi-  
 quempaqueate intati, aisa teequea  
 quericaca incatsimatantashitaquempa-  
 quea intati. <sup>26</sup>Ariquea oquempetaca  
 imaica cameetsaniji antsajiaqueriniji  
 aatimpajia iriraquea Aapani Irioshi  
 icocani tampatica iroaqueru. Oraquea  
 ishetacojiaqueriguetei aventajiacarica  
 Jesoshi, teequea irimeshiantashitempaji  
 intati, manaquea yamenajiaqueriquea  
 yaventajiapojari, itsajiaquequea  
 imetojaventajiaqueri.

**Taaqueate asemejianquempacate**

<sup>27</sup>Iroosacanicate čtaaueate opaji  
 aasetantajiaquempacate aatimpajia?

iTaampate! ¿Arimpate quero ocoani?  
 Teequea irooquee irishetacotantajiaji  
 Aapani Irioshi iramenajiacajiguetei  
 anetsanamajajiaquero maasanopae  
 igantacaantane, manaquea icavintsaja-  
 majajiacaji yamenajiacaji aventaventa-  
 shirentajianajari Jesoquirishito.  
<sup>28</sup>Irootaquequea noncantantajiaquem-  
 pica irishetacojiaqueriquea Aapani  
 Irioshi maasano aventajiaquemparineca  
 Jesoquirishito, teequea incantacojitaje-  
 roji imaica: “Intsishiatsi pinetsanatajero-  
 shiatsi itioncacotanaqueca Moishishini  
 irishetacotimentajitaquempinijite.”  
<sup>29</sup>Iriaquea Irioshimajaca ¿arimpate  
 apaniro irioshicari joriojia? ¿Arimpate  
 teequea irioshitempariji caquintegueta-  
 tsica? Jeejeguitatsi, irioshitacari aisa  
 caquinteguetsica. <sup>30</sup>Tee inchoocateji  
 itsipa Irioshimajaca, apaniromajaca  
 icocani iriatimpa yamenajiaqueri  
 maasano aventajiacarica Jesoquirishito  
 quempejiaca teeca incovaeguishetima-  
 tempaji, irioca totsaiquimashitacaanta-  
 tsica, irioca teeca intsaiquimashita-  
 caantempaji. <sup>31</sup>Iroosacanicate aquempe-  
 jiaqueroguetei imaica aventajiacariguetei  
 Jesoquirishito ¿arimpate ovashiantajia-  
 naqueroqueate itioncacotanaqueca  
 Moishishini? iTeequeate! Arimpaquea  
 anquempejianaquero imaica iroaquera-  
 guetei, anetsanamajajiaqueroquea.

**Quero icocani Averaameni**

**4** <sup>1</sup>Imaica iroguenti noninque  
 nonquenquejacaajiguempirijate  
 Averaameni choviquimajajiaquenaca  
 naatimpajia joriojia, ¿quero icocani  
 iriatimpa? <sup>2</sup>Iroomequea irishineven-  
 quemparimequeate Aapani Irioshi  
 Averaameni taaca opajitapae ipeacaa-  
 guetacaca, iragavejaqueme irisemetaco-  
 vaequemparomequeate, cotanquitsiquea  
 yamenaqueriquea Aapani Irioshi tee  
 onchoocateji taaquea irisemetacotem-

paca. <sup>3</sup>¿Quero ocanque Tioncarentsima-  
jaca? Ariquea ocanque: “Irraquea  
Averaameni yaventanacariquea Aapani  
Irioshi,<sup>j</sup> jeroqueate yamenantacarica  
quejevaecaquea tee incovaeguishetima-  
tempaji.”<sup>k</sup> <sup>4</sup>Iroguenti oquempetacar-  
quea ocatita, quericaca shiacotatsica,  
iroompaquea irivegarajitavajeri teequea  
incantajiteriji: “Manaquea nojocashi-  
quempiri intati, nocavintsajashiquem-  
piquea”, manaquea ivegaratsijitaro-  
quea ishiacoquegueti irooriji yaacotanta-  
que. <sup>5</sup>Cotanquitsiquea inchoocategu-  
eti itsipa aatoquea taaca opajita ipeacagatsi  
cameetsaniji irishetacojiquerinijite  
manaquea iraventapojempari Aapani  
Irioshi, inquenquejanaquequea  
incanque: “Notsamajaque iriraquea  
Aapani Irioshi ishetacotiri covae-  
guishejiatsica”, ariquea iroguenti  
irishetacotaqueriqueate yamenaqueritari  
yaventa-  
pojajari. <sup>6</sup>Ariquee iquempetaca Taavini  
coramani icanque irishinevaequem-  
pa quericaca iramenaquea Aapani Irioshi  
quempeca teeca incovaeguishetimat-  
tempaji, manaquea inchiqiojita icavinta-  
sajashivaecari intati, teenicate onchoo-  
catenica cameetsatsica impeacaguem-  
paca caquinte incavintsajacotantaquem-  
parica Aapani Irioshi. <sup>7</sup>Ariquee icanque:

“Ishinevaetanaja maasano ipeaco-  
tsitajaca Aapani Irioshi ipeaca-  
guishecaca,  
irirajia imaperincacotsitaquea  
igovaeguisherejia!

<sup>8</sup> iIshinevaetanaja irirajia teeca  
inquenquejacageriji Amajirote  
igovaeguisherejia!”<sup>l</sup>

<sup>9</sup>¿Arimpa apaniro irio shinejianqui-  
tsine irirajia icantajitica “totsaiquima-

shitacaantatsica”? ¿Aatempa irio  
shinejianquitsine teeca intotsaiquima-  
shitacaantempa? Intsijate pinquenque-  
jajiguerijate Averaameni. Iriatimpa  
iquemisanqueri Aapani Irioshi  
iquenquejanaque: “Arimaja Aapani  
Irioshi irinetsanaquero icanqueca”,  
irootaquequea yamenantacarica  
quempeca teeca incovaeguishetimat-  
tempaji. <sup>10</sup>Cotanquitsiquea ¿querote  
yamenantacarica Aapani Irioshi  
quempeca teeca incovaeguishetimat-  
tempaji? ¿Ari yamenaqueri itotsaiquijique-  
rogueti ichonquimashi, irooca tequera-  
taguete intotsaiquijiteriji? Teequeate  
ariquee irameneriji itotsaiquijiqueri-  
gueti, manaquea yamenaqueri tequera-  
taguete intotsaiquijiteriji. <sup>11</sup>Irraquea  
Averaameni iroquetitaquea iquemisan-  
queri Aapani Irioshi icanqueriguete  
incavintsajamajaqueri, ocoramanitaco-  
vaetanaquequea itotsaiquijiqueriquea  
intsatantajiquemparoca jac yamenaque-  
riquea Aapani Irioshi quempeca teeca  
incovaeguishetimatempaji irooriji  
yaventanacari. Quempetacaquea  
ipeantajaca choviquishirentajianaqueri-  
neca maasano aventaventaipojajempari-  
neca Aapani Irioshi, totsaiquivetatsica  
aisa teeca intotsaiquijivetempariji.  
Ariqueeate iquempetsijigari Aapani  
Irioshi iriatimpajia aisa, yamenajiaque-  
riquea quempeca teeca incovaeguisheti-  
matempaji. <sup>12</sup>Arimajaguitatsi Avera-  
ameni iriguente choviquijianaquerica  
irirajia itotsaiquijiqueca, cotanquitsi-  
quea teequa noncancoteriji  
itotsaiquitamameashijitacaca intati,  
iriguentequea ichoviquimajajianaqueca  
irirajia quempeajatarica iriatimpa

---

j 4.3 Ocanquegueti *Irraquea Averaameni yaventanacariquea Aapani Irioshi* manaquea ocanque  
itsamajaquero iriatimpa irinetsanaquero Aapani Irioshi maasano icanquerica,  
yaventanacari. (*Abraham creyó a Dios.*) k 4.3 Jen. 15:6; Ga. 3.6. 1 4.7-8 Sar.  
32.1-2.

Averaameni itsariventacagueti, itsaque irinetsanamajaqueroquea Aapani Irioshi icanquerica. Ariqueate iquempetaca imaica tequeratagueti intotsaiquijiteriji.

**Aapani Irioshi inetsanamajaqueroquea icanquerica Averaameni**

<sup>13</sup>Iiraquea Aapani Irioshi icanqueri Averaameni oncoramanitacovaetanaquegueti irojocaqueneri maasanopae quepatsi, irashinqueparoquea iriatimpa aisa inchoviquijiaqueca, cotanquitsiquea teequea ariquea incanteriji imaica yamenaquerigueti inetsanataqueroquea itioncacotanaqueca Moishishini, tequeratanica onchoocatenica. Manaquea icanqueri inejaquerigueti iquemisanqueriquea icanquerigueti incavintsajamajaqueriquea incaramirincajianaquequea inchoviquijianaqueca. <sup>14</sup>Oraquea iriomegueti ashintajiaquemparomequea maasanopae quepatsi irirajia netsanamajiaqueroquea itioncacotanaqueca Moishishini, aatomequea amitacotajime aventaventaivequemparigueti Aapani Irioshi, aatomequea ashintajigarotsi icantacaaquerica Aapani Irioshi Averaameni yamenaquerigueti itsarovencari. <sup>15</sup>Iiraquea tsajivecaroca icantaguetica Aapani Irioshi irinetsanamajiaqueca cotanquitsiquea teequea irinetsanamajateroji, incatsimatimenqueriquea. Oraquea aatomegueti itsajitromequea querocampate incojiqueroni irinetsanajiquero, teetarite intsajiteroji, aatomequeate querica quempetacaantsineca. <sup>16</sup>Iroosacanicimaica, inchiqiojita ininque Aapani Irioshi incavintsajacoqueriquea Averaameni aisa inchoviquijianaqueca, icanqueri ariquea inquempetaqueroquea imaica. Cotanquitsiquea oraquea icanquerigueti incavintsajaco-

majaqueriquea inchoviquijianaqueca, teequea apatiroti iriguentijia inquenquetatsatacojigueji inchoviquijianaqueca netsanajiaqueroquea itioncacotanaqueca Moishishini. Iriguentiquea aisa icantacotajiaque maasano aventajianajemparineca Aapani Irioshi quempemajajiaquemparineca Averaameni yaventsitarigueti. Irootaquequea icantantajicarica Averaameni iriguenti choviquijianacajica maasano aatimpajia aventajiacarica Aapani Irioshi. <sup>17</sup>Ariqueate ocanque Tioncarentsimaajaca: “Nopeacaaquempi choviquijianaqueroquea oshequini caquinteguetananquitsineca.”<sup>m</sup> Iriguentiquea cantanquitsi Aapani Irioshi yamenaquerigueti Averaameni yaventanacari. Iriatimpa iriguenti tancoretancorejajiajerineca metojaguevetatsica, aisa iquenquetsatacotsitacaro tequeratata onchoocateji quejetaca chooca.

<sup>18</sup>Oraquea icanquerigueti Aapani Irioshi Averaameni ipeacaacariquea choviquijianaqueroquea oshequini caquinteguetananquitsineca, jac icantapaeni quenquevarivaetanaji, tequerataquea irijanintempaji. Querocampate incaramirincantajianaquempace inchoviquijianaquempace. Cotanquitsiquea iriatimpa yaventanaguitarini Aapani Irioshi yoguijaguitiniquea irinetsanatavaquerotajate icanquerica, icanqueriqueate: “Ariqueate inquejejaquempaquea pinchoviquijianaqueca iroshequiavaetanaquequea.”<sup>n</sup> <sup>19</sup>Iiraquea Averaameni irooshipoji irajagantsitacotanaque 100, yamenaca iriatimpa jac quenquevarivaetanaji icanca irooshipoji irimetoje, querocampate incoquempani iroacaantaquegueti. Ariqueate oquempetaca Sara imanquigare, pirijavaetaque oamento, cotanquitsiquea irira Averaameni teequea

m 4.17 Jen. 17.5. n 4.18 Jen. 15.5.

irimagoshirentanaqueji arimpaqueate yaventamajatanacari Aapani Irioshi.

<sup>20</sup>Teequea incanteji: “Aricajate irinetsa-nataqueroquea Aapani Irioshi icanquenaca.” Manaquea arimpaquea yaventa-namajatanacari, aisa arimpaquea ishineventamajatanacari icanque:

“Caaviji yagavejamajati Aapani Irioshi.”

<sup>21</sup>Itsamajaquequea teequea omanapitsa-tempariji irinetsanaqueroqueate icanquerica, yagavejamajatiari.

<sup>22</sup>Irootaquequea yamenantacarica Aapani Irioshi Averaameni quempeca teeca incovaeguishedimatempaji.

<sup>23</sup>Cotanquitsiquea otioncacagueti “yamenantacarica quempeca teeca incovaeguishedimatempaji”, teequea apaniro intioncacotimentajiteriji Averaameni. <sup>24</sup>Itioncacotsijitacajiquea aatimpajia aisa, yamenajiacajiqueate quempeca teeca ancovaeguishedimatempaji aventajianajaritari iriatimpa, iriotaquequea vohatajiri Amajirote Jesoshi imetojavecagueti. <sup>25</sup>Iriraquea Amajirote iriotaquequea itigarancaquea Aapani Irioshi irimetojventajiacajiquea aatoniji icatsimatimentajiajirotsi agovaeguisherjia. Ariquea imetojaquegueti ivohatajiri cameetsaniji iramenimentajiajinijite quempeca teeca ancovaeguishedimatempaji.

**Aapani Irioshi yamenajiacaji quempeca teeca ancovaeguishedimatempaji**

**5** <sup>1</sup>Imaicaquea imaica jac yamenajiacaji Aapani Irioshi quempeca teeca ancovaeguishedimatempaji, yamenajiacajitarite aquemisanqueroquea icanquegueti irishetacojiaqueriquea iguempvaere maasano aventajiaquemparineca Jesoquirishito. Jero imaica teequea antsaroacaajiajempari incatsimajiacaji manaquea ashinejiaca, iriotaquequea quempetaqueroa imaica Amajirote Jesoquirishito. <sup>2</sup>Iriotaquequea metoja-

ventajiacaji, jero icocani icavintsajamajacaji Aapani Irioshi yamenajiacajitarite aventajiacari. Ashinejiaca acanca aguijacojiacagueti oncoramanitapojagueeti amenajiapojero iroganejencare Aapani Irioshi. <sup>3</sup>Cotanquitsiquea teequea aparo onchoocateji ocatica.

Aisa ashinevaetaaquea atsipevaeca-gueta, atsamajajiaquetari antsipevaeta-quempagueta irootaquequea antsatanjianaquempaquea cameetsaniji agavejiaqueniiji antampishitashijiaqueroniji covaequishedantatsica arimpaquea antsaromentamajatanaquempari.

<sup>4</sup>Oraquea antampishitashijiaquerogueta antsipevaequempagueta intsajiqueroquea arimajaca otampaticataque atsaromentamajacari, iroompaquea aguijacojianaca anquempejianaquempariquea iriatimpa oncoramanitapojagueeta. <sup>5</sup>Oraquea aguijacotavajerogueta onetsanantatuempaca icanqueca Aapani Irioshi aatoquea ovashiventajaji. Choocatarite ichoocashirentajiacaji Ishire Aapani Irioshi yojocajiacajica, iriotaquequea tsatacaajiacaji ipintsamajiacaji Aapani Irioshi.

<sup>6</sup>Coramani aatimpajia teequea antsajigueta querocampate ancojiaquempani ashetacotacaantajiaquempagueta, cotanquitsiquea ocoramanitapojagueeta arejevaepojaca savincaguiteri inintantacaroca Aapani Irioshi, ariquea imetojventajiacaji Quirishito maasano aatimpajia covaequishejiatsica. <sup>7</sup>¿Arimpate quericampate nintanquitsineca irimetojavenqueri iripacajuntejiate comajamajatsica? Iroompaquea inchoocategueta cavintsajantamajantatsica, iriotaquequea arica iragavejajite irimetojventajiqueri. <sup>8</sup>Cotanquitsiquea jeroquea yonigaantantacajiroca Aapani Irioshi arimaja ipintsamajajiacaji: Quirishito imetojventajiacaji aatimpajia maasano covaequishejiatsica

tequeratirajagueti ancantashitajia-  
guempaji.

<sup>9</sup>Ochovivincajaventanacaji iriraja,  
irootaquequea yamentajiacajica  
Aapani Irioshi quempejiacaji teeca  
ancovaeguishedimatempaji. Jero  
atsamajatantacaca arimajacatari  
yaajivajajitari Quirishito aatonijite  
icatsimatimentajiajirotsi Aapani Irioshi  
agovaeguisher oncoramanitapojaje-  
gueti. <sup>10</sup>Coramani teequa ashineventa-  
jiavetempariji Aapani Irioshi. Ariquea  
iquempetaca iriatimpa teequea irishine-  
ventajiavetajaji aatimpajia, cotanquitsi-  
quea ocoramanitapojaquegueti itigaranc-  
aqueri Irijanite imetojaventajiacaji  
cameetsaniji ashineventavacaajiaquem-  
paniji. Quempeca imaica ashineventava-  
caajiacagueti, iroompaqueate caaviji  
iraajivajajaji aatoniji apega camoreca-  
riqui, pochatanajitarite ariquea icocani  
ichoocati. <sup>11</sup>Teequea aparo ocatita,  
yoguishinejajiacaji Aapani Irioshi aisa,  
iriotaquequea quempetaqueroquea  
imaica Amajirote Jesoquirishito metoja-  
ventajiacajica cameetsaniji irishineven-  
tajiajiniji Aapani Irioshi.

**Araini aisa Quirishito**

<sup>12</sup>Paesatoniqui apatsinoro caquinte  
covaeguishedanquitsica, ariquea  
icanqueri Aapani Irioshi irimetojaneta-  
naje. Irootaquequea imetojantajiajaca  
caquinteguetatsica iroguentiquea  
quejetacaajiajariquea igovaeguisherajia,  
maasanotari icovaeguishejiaca.  
<sup>13</sup>Coramani tequeratagueti intioncote-  
roji Moishishini maasanopae icanque-  
rica Aapani Irioshi, jac covaeguishejiaca  
maasano caquinteguetatsica, cotanqui-  
tsiquea teequea incanteji Aapani Irioshi:  
“Teequea irinetsanajigueroji noganta-  
caantane, nonquenquejacaajiaqueriquea  
oncoramanitapojajegueti.” Tequerata-  
queate intioncacaanteroji. <sup>14</sup>Irirajiaquea

caquinteguetatsica ichoviquijianaquea  
Araini maasano icovaeguishejiaca,  
cotanquitsiquea teequea inquempemaja-  
tajempariji Araini peacaaguishacaroca  
icantimenquerica Aapani Irioshi.  
Icojiacaniquea iquempejiaca imaica  
arejevacaroquea itioncacotantanaca-  
roca Moishishini icanquerica Aapani  
Irioshi. Oraquea icovaeguishecagueti  
Araini irooquea oshimerancantapojaca  
yamentajiajaroca maasano imetojane,  
cotanquitsiquea iriraquea coraquetaqui-  
tatsica ocoramanitapojaquegueti  
manaquea imetojaventsijigari maasano  
cameetsaniji irimeshijiaquerinijite.  
<sup>15</sup>Apatsinoroquea covaeguishevetatsica  
Araini ariquea yamenajiaqueroquea  
imetojane maasano caquinteguetatsica,  
cotanquitsiquea Aapani Irioshi caaviji  
icavintsajamajiacajaji niganquiquea  
anaavaetanaqueroquea icovaeguisheca-  
gueti Araini metojacaajiajevcajica.  
Itigarancantarica apatsinoro Jesoqui-  
rishito irimetojaventajiacaji. Ocorama-  
nitapojaquegueti icoraquetaque  
iriatimpa ariquea iquempetaqueroquea  
imaica ipintsamajiacajaji imetojventaji-  
acajaji irimeshijiaqueriquea incaramirin-  
cajianaque caquinteguetatsica.  
<sup>16</sup>Oraquea icavintsajacajigueti Aapani  
Irioshi, tee onquempetemparoji  
icovaeguishecagueti Araini. Iroaquera-  
gueti apatsinoroquea Araini icovaegui-  
shhecagueti ariquea ishimerancacajiro  
yamentajiacajica Aapani Irioshi  
maasano acovaeguishejiaca, cotanquitsi-  
quea caaviji ipintsamajiacajaji  
aatimpajia caramincatacaacaroca  
covaeguisherentsi, ivetsinantacotajaji  
yamentantajiajajica quempeca teeca  
ancovaeguishedimatempaji. <sup>17</sup>Iroaquera-  
gueti icovaeguishecagueti apatsinoro ari  
aapojacajaji metojagantsi, imaicampani  
icavintsajacopojajajigueti apatsinoro  
Amajirote Jesoquirishito yanijacaashi-

rentapojajaji imajirontacaashirentapojajaji maasano aatimpajia ishetacojia-queca apeantanajaca comajari.

<sup>18</sup>Icovaeguishecatarite apatsinoroveca Araini icantomajacotantajitacarica maasano caquinteja imetojanetantana-caca. Ariquea iquempetaca coramani apatsinoroquea Jesoquirishito imetoj-ventajiaqueri maasano cameetsaniji iramenajiaqueriniji Aapani Irioshi quempeca teeca incovaeguisheetimatem-paji iroompaquea incoquempani inchoo-cajiaje. <sup>19</sup>Apatsinoroquea icocani Araini teequea inquemisanteriji Aapani Irioshi, ariquea icovaeguisheetantajanacaca maasano caquinteguetatsica. Ariquea oquempetaca aisa apatsinoroquea icocani Jesoquirishito iquemisantamaja-queri Aapani Irioshi, yamentajicarica caramirincajianquitsica quempeca teeca incovaeguisheetimatempaji.

<sup>20</sup>Coramani Aapani Irioshi icanqueri Moishishini intioncaqueroquea maasanopae icantaguetica cameetsaniji intsajiaqueniji ishiraerijia manaquea icovaeguishejiaca, teequea irantajigueroji inintaguetica iriatimpa, cotanquitsiquea arimpaquea itiroroncamajatanacaro. Cotanquitsiquea icaramirincatacajiaveca-rogueti covaequisherentsi, arimpaquea icavintsajamajajiaqueriquea Aapani Irioshi anaavaetanaqueroquea jmm. <sup>21</sup>Coramani mana oquejevetaca omajironca covaequisherentsi imetojanetantacaca caquinteja. Cotanquitsiquea imaica iroguenti majiron-tamajapojajatsi igavintsajacotantare Aapani Irioshi ancomajatimenquempaniji anijaguiteniji. Iriotari quejequero Amajirote Jesoquirishito.

**Ametojapitsajiaqueroquea  
covaeguisherentsi**

**6** <sup>1</sup>Iroosacánica ¿querocaca ancantajiguenu imaica? ¿Arimpa jatanatsi ancovaeguishejiguempani cameetsaniji

incavintsajamajajiacajinijite Aapani Irioshi? <sup>2</sup>¡Aatoshinete! Pamenerijate metojari imetojimaque teequea jatanatsi incovaeguisheetajatemalaquea, jac metojaque. Ariquea aquempejiaca aatimpajia aisa atsaromentimajiacari Quirishito quempetaca ametojapitsajia-queroquea covaequisherentsi, ¿ariquea quero ancojiaquempani jatanatsi ancovaeguisheetajatemalaquea? <sup>3</sup>¿Arimpa tee pintasajigeeji, maasanoquea aviñacajatimentajiacarigueti Quirishito Jesoshi, oquempetaca atsipajiacari imetojaquegueti? <sup>4</sup>Oraquea imetojaquegueti Quirishito yoguijaajivequitari omoroqui. Ariquea oquempetaca aviñacajiacagueti aatimpajia iroguenti ocantacoque yoguijaajivetaquitarigueti coramani, quempetaca aricaca aconoita-jari yoguijaajiquerigueti, cotanquitsi ipochatanaji. Iroguentiquea vochatajiri iroganejencare Aapani Irioshi. Ariquea oquempetaca aisa asotoajajianajigueti ojaaquí quempeca aricaca aconoitajari ipochatanajigueti cameetsaniji ancantashitatijaianajempanijite aatoniji aquempejiatatsi tequeratagueti antsaromentempariji.

<sup>5</sup>Jac aconoajiacari Quirishito imetoja-quegueti quejetaca ametojajiaque aatimpa, ariquea anquejejiacquempa anconoajiaquempari aisa ipochatanajigueti. <sup>6</sup>Imaica atsamajajiaque oraquea yompajacojiquerigueti Quirishito quempetaca aricaca itsipatacaantajiacajiri ampajacojiaca aatimpajia ametojapitsajiaqueroquea covaequisherentsi aatonijite omperaperaatajaji. <sup>7</sup>Iriratari metojari tee inquemajeroji covaequisherentsi omperaperaavecarica. <sup>8</sup>Imaica jac atsipajajari Quirishito ametojajiaque, atsajiaquequea anijajianaje anconoapojajempari. <sup>9</sup>Atsamajajiaquequea ipochatimatanaji Quirishito imetojave-tacagueti aatoquea imetojimatajitsi aisa,

yagavejamajaqueroquea metojagantsi, aato agavejajiri. <sup>10</sup>Oraquea imetojantacaca iroguenti imetojimenta que agovae-guisherjia, aparo imetojaquiti iteronca-quitiro. Cotanquitsiquea yanijanajigueti iriguenticquea yanijimentanaji Aapani Irioshi. <sup>11</sup>Imaica ariquee pinquempeji-queempa aviatimpajia, pamenempajate quempeni pimetojapitsaquero covae-guisherentsi, iriguenticquea panijimentanaji Aapani Irioshi, itsipatanajimpitari Quirishito Jesoshi. <sup>12</sup>Shoshoh pimajirontacajaarotsi covae-guisherentsi pitsinometojanequi, piquemisantajirotsi pinintaguishevecaca. <sup>13</sup>Oraquea pacopae, piguitipae, pinene, poquija, maasanopae, aatoja pipeacaaguishetan-tajarotsi taaca opajitapae covae-guisherentsi, iriguenticquea ashintajemparone Aapani Irioshi. Pincantsitempariquea irashintamajatempi iroorijite yanijacaa-jimpi pimetojashirentavecagueti. Manaquea irashintatsinotajempi maasano pimpeacaantanajemparoca cameetsaripae. <sup>14</sup>Aatotarite omperape-raatajimpitsijate covae-guisherentsi, teetarite onquejetajemparoji ipanquena-panquenajiveguitaroni itioncacotana-queca Moishishini, manaquea icavintsa-jacojiaquempi Aapani Irioshi yagaveja-caajiaquempi.

**Quero icotani savicaventiroca  
covae-guisherentsi aisa savicaventiroca  
inintaguetica Aapani Irioshi**

<sup>15</sup>Iroosacania ¿querocaca ancanta-jigüe imaica? Amenajiaqueriquea icavintsajamajajiacaji Aapani Irioshi, teequea incantajiajaji anetsanajiajeroji maasanopae icantaguetica coramani irinetsanajitaje, ¿arimpate nintanatsi ancovae-guisherjiguempanijate? ¡Aatojate aquempejiguirotsijate imaica!  
<sup>16</sup>Aviatimpajia pitsajiguitarite inchooca-tegueti aparo caquinte inchiqiojita

impimantaquempa irashintajiquempari, inquemisantamajaqueriquea ashinquem-parineca iroompaquea irashintaquiti-guempari incoquempani inquempeta-queempa quea imaica, ¿arimpate queroquea incoquempani iroanaje osamani inchoocatashitajempanijite intati? ¡Aatoja yagavejitsi! Ariquee piquempejiaca aviatimpajia imaica, iroogueti pishineventajiaquempa quea pincovaeguisherjiguempa quea, quempe-caquea ashintamajaquempi covae-guisherentsi, iroompaquea pimetojajia-naque poapoaitanaque camorecariqui. ¡Querocampate pincojiaquempañi povashiantajianajerojate! Oraquea iroogueti pishineventajiaquempa quea pinquemisantajianajeri Aapani Irioshi, intampishitacaajianaquempiquea cameetsaniji pincomajamajianaquempañi. <sup>17</sup>Coramani oquejetaca ompera-peraavetaquempi pigovae-guisher ashintavetaquempi, cotanquitsiquea imaica iroguenti piquemisantajiaji itsatacaajitaquempica pinintamajiajia-vaquero, irootaquequea nocantantacarica Aapani Irioshi, “Ariotesaa.” <sup>18</sup>Yaajitana-jimpi, tee ashintajempi covae-guisherentsi, irooquea imaica omperaperaanajimpi comajamajatagantsi.

<sup>19</sup>(Iroguenti notsavetacoguetanaque-quea imaica yamenaguetica caquintejia cameetsaniji pinquemajiaqueni taaca opaji nocanqueca, namenaquequeate aatogueti noquempetiroquea imaica manaquea omanapitsajiaquempiquea.) Quejetaca omanani pipimantatsinove-taca pimpeacaaguishetaquempañi covae-guisherentsijia pintigarisevaeque-roniji, imaicampañi iroguenticquea pimpimantatsinotajempa pimpeacaanta-jemparoca cameetsaguetatsica pincoma-jatimentajempaniji.

<sup>20</sup>Ogantagatirajagueti omperaperaa-quempi covae-guisherentsi, teequea

pincomajamajiguempaji. <sup>21</sup>Oraquea piquempejiavecagueti, ¿arimpate queroquea ocojiaquempini? ¿Arimpate ocoani oshinetacaajiaquempi ovashiventajiaquempica imaica? iTeequeate! Teequea anijacaanteji quempeguetacaroca imaica, manaquea oacaanti camorecariqui. <sup>22</sup>Cotanquitsiquea imaica jac yaavajimpiquea Aapani Irioshi aatonijite omperaperaatimpi covaequisherentsi, iriguentiquea ashintajajimpi, pisavicaventanajiroquea inintaguetica iriatimpa, ariquea picotanaca picomajamajajianaca, pincantacoguitempani panijaguiteni. <sup>23</sup>Oraquea irivegaratantajitaquemparica peacaacaroca covaequisherentsi, iroguenti metojanentsi. Cotanquitsiquea ora irojocashijiaquenerica Aapani Irioshi tsipashirentajiaquemparineca<sup>o</sup> Amajirote Quirishito Jesoshi, iroguenti anijagantsi, incoguitempani iranijaguiteni.

**Tsaroventajiatsica iquempejiacarometojacotegueti manquigarentsi**

**7** <sup>1</sup>Napitsaroventarijiate, iintsijate pamenajigue intati. Aviatimpajia pitsajiguirotarite quero ocoani maasanopae icantimentantajiguetic. Iroguentiquea icantimentajiqueriquea tequeratagueti irimetoje. Oraquea irimetojaquegueti ariquea iroguenti aatojate icantimentajitajiritsi, metojaquetarite. <sup>2</sup>Pameneja icantantajicaroca manquigarentsi shiramparitatotsica teequa oncameetsateji ovashiantsitaquemparigueti manquigataroca tequeratagueti irimetojeji irimanquigatajempaquea itsipa. Oraquea arigueti irimetojanaje, ariquea iroguenti aatojate icantimentajitajirotsi. <sup>3</sup>Cotanquitsiquea

oraquea choocaturajagueti ichoocati manquigataroca iroompaquea oncanqueri irimanquigatajempaquea itsipa, ariquea iroguenti manaquea opeacaaguisheca covaequisherentsi. Oraquea arigueti irimetojanaje manquigataroca, ariquea iroguenti querocampate incantimentajiqueriquea, cameetsavaeque irimanquigatajempaquea itsipa, aatoquea icantajititsi: “Opeacaaguishecaro covaequisherentsi, aimentacari manquigataroca.”

<sup>4</sup>Irootaquequea imaica, napitsaroventarijiate, aviatimpajia quempejiacquempiquea pimetojapitsajiaqueroquea itioncacotanaqueca Moishishini, piconoitajari Quirishito imetojaquegueti cameetsaniji irashintamajajajempiniji, iriotaquequea tancorejanajatsica yoguijaajivecarigueti. Ariquea oquempetaca imaica cameetsaniji pinetsanamajaqueveronijite inintaguetica Aapani Irioshi. <sup>5</sup>Oraquea tequeratagueti antsaroventajiguempariji manaquea asavicaventajiaqueroquea apeacaaguishejiacaroquea taaca opaji anintajiguica aatimpajia. Oraquea atsavetacarogueti icantimentantajiguetic caaviji anintamajajianaque ampeacaaguishejianaquempaquea taaca opajitapae covaequisherentsi, nintanatsimequea anquempejiacquempamequea imaica oahoitanaquemequeate camorecariqui. <sup>6</sup>Cotanquitsiquea imaicaquea imaica quempeca aricaca ametojapitsajiaqueroquea itioncacotanaqueca Moishishini cantimentajivecapiroca taaca opajitapae covaequisherentsi. Imaica manaquea asavicaventajanaje anetsanamajajianajeroquea maasanopae inintaguetica Aapani Irioshi. Teequea irooquea quempejiatine itioncacoji-

**o 6.23** *tsipashirentajiaquemparineca Amajirote Quirishito Jesoshi.* Iriojiaquea aventajigarica Quirishito, tsaroventajigarica. Pamenero aisa 8.1; 2 Co. 5.17.



queca, iriguentiquea cantashitatiacijacaji  
Ishire Aapani Irioshi.

**Covaeguisherentsi  
pantashirentavaetaquenaca**

<sup>7</sup>Iroosacanica, ¿querocaca ancanta-  
jigue imaica? ¿Arimpate ariquea  
ancantajigue ooquea coguisherio itionca-  
cotanaqueca Moishishini? ¡Aatoshine!  
Oraquea aatomegueti notsatiromequea  
queroca ocani, aatomequeate notsati-  
mequea manaquea nocovaeguisheca.  
Pameneja aatomegueti ocani: “Aatoja  
pinintsigueteritsi yashintaguecaca  
itsipa”,<sup>p</sup> aatomequeate notsatiromequea  
covaeguisherentsi nonintsitantagueque-  
gueti. <sup>8</sup>Imaicaquea imaica notsaquero-  
quea, irootaquequea oshimerancantapo-  
jaca nonintamajaqueroquea nompeacaa-  
guishejiaquemparoquea taaca  
opajitapae covaeguisherentsi natsireca-  
cotanacaroquea, nashiquea noaquero  
iroaqueragueti nocovaeguishevaeca-  
gueti. Oraquea aatomegueti atsajiguime-  
quea icantimentantajitiroquea taaca  
opajitapae, aatomequeate anintamajati-  
mequea ampeacaaguishejiaquemparoe-  
quea, cotanquitsiquea atsajiaqueroqueti  
icantimentantajiqueroquea manaquea  
anintamajajianaque ampeacaaguishejia-  
naquemparoquea taaca opajitapae  
covaeguisherentsi. <sup>9</sup>Coramani tequerata-  
gueti nontsamajateroji itioncacotana-  
queca Moishishini tee anejeroji  
querocampate shoshoguitetacaavaeque-  
naneca, teequea nontsatenica manaquea  
nocovaeguishetaca, cotanquitsiquea  
iroompaquea notsamajatanaqueroqueti  
namenamajataquequea manasacanica  
nocovaeguishevaeca ariquea noshimam-  
pojancavaetanaca, notsatanaquequeate  
incatsimatenanishiatsi Aapani Irioshi  
oncoramanitapojajegueti. <sup>10</sup>Coramani

Aapani Irioshi itioncacaqueriquea  
Moishishini maasanopae icanquerica  
irinetsanajiqueroquea cameetsaniji  
inchoocatimentajiaqueniji maasano  
netsanajiaqueroneca, cotanquitsiquea  
naatimpa namenaqueroquea irooquea  
oshimerancantapojaquempaca  
incatsimatantaquenaca Aapani Irioshi  
oncoramanitapojajegueti, teequea  
nonetsanamajajigueronica. <sup>11</sup>Irooquea  
notsamajaqueroqueti itioncacotana-  
queca Moishishini, teequea noshineven-  
tajemparoji nonetsanamajatajeroja,  
iroguentiquea noshineventavaetanaca  
maasanopae icantimentantajitica,  
irooquea nopeacaaguecaca. Irootaque-  
quea itsatantajicaroca manaquea  
incatsimatenanishiatsi Aapani Irioshi,  
naroguentiquea quempetacaantanquitsi-  
neca. <sup>12</sup>Cotanquitsiquea atsajiaque  
oratica itioncacotanaqueca Moishishini  
iroguenti caaviji oganejencaca,  
irootaquequea itioncacotaqueca  
icantaguetica Aapani Irioshi, aisa  
otsatacaajiacaji ancomajamajajiaquem-  
paja.

<sup>13</sup>Oraticaquea cameetsatsitsica itionca-  
cotanaqueca Moishishini, ¿arimpa  
irooquea oacaantaquenameca camoreca-  
riqui? ¡Aatoquea! Oraquea covaeguishe-  
rentsi, iroguenti metojacaantaquena-  
meca noantanaquempameca camoreca-  
riqui. Notsavecaroquea icanqueca  
Aapani Irioshi, cotanquitsiquea iroguen-  
tiquea oshimerancantapojacaroquea  
nopeacaaguishevaetanacaroquea  
icantimentantajitica. Irooqueate  
itsatantajicaroca caaviji anaqueroquea  
nocovaeguisheca. <sup>14</sup>Atsajiaquetari  
itioncacotanaqueca Moishishini  
oponeaca Ishirequi Aapani Irioshi,  
cotanquitsiquea naatimpa naroguenti  
caquinte, oquejevetaca ipimantajita-

quena irooquee ashintajana covaequisherentsi. <sup>15</sup>¿Querocaca nococani naatimpa? Nonintaveca nonetsanaque-romequea icanquea Aapani Irioshi, cotanquitsiquea teequea nagavejeji. Iroguentiquea nopeacaanacaquea teeca nonintavetemparoji nompeacaguemparoquea. <sup>16</sup>Oraquea nopeacaacagueti teeca nonintavetemparoji nompeacaguemparoquea, notsaque iroguenti covaequisherentsi, irotaquequea nocantantacaca caaviji oganejencacacioncacomanaquea Moishishini, ocantimenquenaroquea nopeacaacaca. <sup>17</sup>Aritarite teequea naroguenti quejevetatsine, iroguentiquea quejetacaaquena covaequisherentsi pantashirenquenaca. <sup>18</sup>Notsaquequea ariquea nococani naatimpa, teequea nagavejeji noncomajamajatempaji, caquinte nonaque. Nonintavecaquea noncomajamajaquempamequeate, cotanquitsiquea teequea nagavejeji. <sup>19</sup>Nonintaveca nonetsanaque-romequeate inintaguetica Aapani Irioshi, cotanquitsiquea teequea nagavejeji. Manaquea nopeacaacaroquea covaequisherentsi teeca nonintavetempaji naatimpa nompeacaaguemparoquea. <sup>20</sup>Arigueti nompeacaaguemparo teeca nonintavetempaji, teequea naroguenti quejetatsine, iroguenti quejetacaaquena covaequisherentsi pantashirenquenaca.

<sup>21</sup>Jeroquea namenaqueca: noninqugueti nompeacaaguemparo cameetsari, quishotia oaquena covaequisherentsi. <sup>22</sup>Noshineventavecarotari noshirequi maasanopae icantaguetica Aapani Irioshi, <sup>23</sup>cotanquitsiquea namenaquero otsipa notsinoqui quejevetaca ashimirintaguenquejanetacaro nonintavecaca, quejetaca oishotacotaquena covaequi-

sherentsi. <sup>24</sup>Querocashiatsi noncotempapani naatimpa! ¿Querocampate oishorejacoquenane aatonijite agavejajana covaequisherentsi choocaturajanagueti notsinometojanequi? <sup>25</sup>Noshineventavaetanacari Aapani Irioshi, nocantanaqueri: “¡Arioteesa!” iriotaquetari oishorejashirentacotajana Amajirote Jesoquirishito.

Jeroquea namenaqueca: naatimpaquea noguenquejanequi nonintamajataque nonetsanataqueroquea maasano igantacaantane Aapani Irioshi, cotanquitsiquea notsinoqui noquemisantavecaroquea covaequisherentsi.

**Queroca icojigani  
ichoocashirentajaquea Ishire Aapani  
Irioshi**

**8** <sup>1</sup>Imaicaquea imaica aatoquea icatsimajiguiritsi Aapani Irioshi irirajia tsipashirentajiacarica<sup>q</sup> Quirishito Jesoshi, irioquea irirajia teeca irisavicaventajajeroji impeacaaguishetajemparo taaca opaji inintajiguica iriatimpajia, manaquea isavicaventajajia inintaguetica Ishire Aapani Irioshi. <sup>2</sup>Aritarite itsatacaantane Ishire Aapani Irioshi anijacaaquerica maasano aventajigarica Quirishito Jesoshi ocanquequea aato agavejajana tioncarentsi cantatsica irimetojaque maasano covaequishejatsica. <sup>3</sup>Oraquea teeca agavejempaji itioncacotanaquea Moishishini irooriji acojiaca caquinteja teequea antampishitashiteroji covaequisherentsi, yantaqueroquea Aapani Irioshi itigarancacherigueti Irijanite irimetojaventajiacaji. Iriatimpa iquempetsinomajatacaji aatimpajia covaequisheri, cotanquitsiquea teequea incovaequishetimatempaji, jero yagavejantacaca imetojaventajia-

**q 8.1** *tsipashirentajiacarica Quirishito Jesoshi.* Iriojiaquea aventajigarica Quirishito, tsaraventajigarica. Pamenero aisa 2 Co. 5.17.

caji. Oraquea imetojaventajiacajigueti icatsimatimenqueri Aapani Irioshi agovaeguisherejia aatonijite icatsimajia-jitsi aatimpajia oncoramanitapojajegueti. <sup>4</sup>Iquempetaqueroquea imaica cameetsaniji agavejajiaquenijite anetsanamajajiaqueronijite maasanopae icanqueca Aapani Irioshi, teequeate irooquea asavicaventajiajeji ampeacaaguishetajemparoquea taaca opaji anintajiguica aatimpajia, manaquea asavicaventajiaje inintaguetica Ishire Aapani Irioshi.

<sup>5</sup>Irirajiaquea savicaventajiguiroca taaca opaji inintajiaqueca iriatimpajia, iroguenti iquenquejacogueque irashipae caquinte, cotanquitsiquea irirajiaquea savicaventajiaqueroquea inintaguetica Ishire Aapani Irioshi manaquea iquenquejacoguequeroquea irashipae Ishire Aapani Irioshi. <sup>6</sup>Irirajiaquea savicaventajiaqueroquea inintajiguica iriatimpajia irimetojajianaque. Cotanquitsiquea irirajiaquea savicaventajiguiroca inintaguetica Ishire Aapani Irioshi iranijacaajitaqueriquea ishirejiaqui aatonijite itsarocaaajiajaritsi incatsimajiajeriquea Aapani Irioshi.

<sup>7</sup>Irirajiaquea maasano savicaventajiguiroca inintajiguica iriatimpajia iriguentijia catsimacatsimaticirica Aapani Irioshi. Teequea irinetsanajiguroji icanqueca, aisa aatoquea yagavejajiguitsi irinetsanajiaqueroquea. <sup>8</sup>Irirajia savicaventiroca inintaguishejiaqueca teequea iragavejajigueji iroguishinejajiaqueriji Aapani Irioshi.

<sup>9</sup>Cotanquitsiquea aviatimpajia teequea irooquea pisavicaventajigueji pinintajiguica aviatimpajia, iroguenti pisavicaventajiaque inintaguetica Ishire Aapani Irioshi, arimajagueti ichoocashirentajiaquempi. Querica teeca inchoocashirenteriji Ishire Quirishito, teequea irooquea ashintemparine

Quirishito. <sup>10</sup>Cotanquitsiquea imaica ichoocashirentajiaquempiquea Quirishito, oraquea pitsino iroguenti-quea metojanquitsine irooriji picovae-quishejiavetaca, orampani pishire anijanaji, yamenajiaquempitari quempeca teeca pincovaeguishetima-tempaji. <sup>11</sup>Iriogueti choocashirentajiaquempi Ishire vochatajirica Jesoshi imetojaventajiacajigueti, ariquea irira vochatajirica Quirishito Jesoshi inquem-petacaajiaquempiquea aviatimpajia aisa, iranijacaajiajempiro pitsino teeca onquishometojaneteji. Iriotaquequea anijacaajempirone Ishire choocashirentaquempica.

<sup>12</sup>Napitsarorentarijiate, irootaquequea imaica apatsinoroquea iriatimpa antsarorentajiaquempaca aatonijite irooquea asavicaventajiguitsi taaca opaji anintajiguica aatimpajia. <sup>13</sup>Iroogueti pisavicaventajiaquequea taaca opaji pinintajiguica, ariquea pimetojajianaque, cotanquitsiquea pinquemisantajiaquerigueti Ishire Aapani Irioshi, iragavejacaajiaquempiquea panaantavaquemparoca maasanopae pipeacaaguishhejiavecaca, oncoramanitapojajegueti panijaguiteni iriatimpaqui. <sup>14</sup>Maasantari ijjivatanaqueca Ishire Aapani Irioshi, iriguentijia irijanijiate Aapani Irioshi.

<sup>15</sup>Iriraquea Ishire Aapani Irioshi ichoocashirentajiaquempiquea, teequea irooquea inchoocashirentashijigueti pinquempiejaquempa tequeratagueti pintsarorentajiaquempiriji Aapani Irioshi pitsarocaaajatarigueti incatsimajiaquempiquea. Iroguentiquea ichoocashirentashijiaquempiquea impeacaajiaquempiquea irijanijiate Aapani Irioshi, jero amanantajiacarica Aapani Irioshi acantantajiacarica: "¡Aapani!" <sup>16</sup>Iquenquetsashirentacaajiacaji Ishire Aapani Irioshi atasantajiacaca aroguentijia

irijanijate Aapani Irioshi. <sup>17</sup>Aromajagueti irijanijate atsajiaque irojocajiacajiro Aapani Irioshi maasanopae inintacaitsijiacajica, cotanquitsiquea iroguentiqueate coguitejacomajatanquitsica antsipejiaquempaquea anquempjiaquempari Quirishito yatsipevaetacagueti cameetsaniji anquempjiaquempariniji iriatimpa oncoramanitapojajegueti, antsipatsipaitanajempariquea ashintashintaipojajemparo maasanopae yashintacaca iriatimpa, anquempetapojajempari yoganejencacagueti.

**Oncoramanitapojajegueti  
anquempemajajiaquempari Quirishito**

<sup>18</sup>Iroomajaca noncantajiaquempica caaviji ashinevaequempaquea oncoramanitapojajegueti oahoaitanaquegueti jenoqui amenajiajerigueti Quirishito anquempjiaquempariquea, anaavaetaqueroquea maasanopae atsipevaetacaca imaica. <sup>19</sup>Maasanopae ipeacaaguecaca Aapani Irioshi oguijajiaquequea aapojempagueti ironigaantantajitaquemparica irijanijate Aapani Irioshi. <sup>20</sup>Maasanojatarí ipeacaaguetaacaca teequea onquempetajemparoji iroaqueragueti ipeacaacarogueti, imaicampani atsipetsipeica, otsoroavequita, ichooavequita. Teenica irio ninterone iveacaane, iriguenti quejequero peacaacarica yamenaquerigueti icovaeguishe-taca caquinte. Manaquea yoguijaguijai-  
quero onetsanatantanajempaca. <sup>21</sup>Aatotari icotani iquempejiajatsi imaica yatsipejiacarogueti maasano imetojane, yavejancajiaquea maasano, manaquea intsipatsipaitanaquempari-  
quea maasano irijanijate Aapani Irioshi incantashitajiaianaquempaquea iroganejencajiaquempa. Ariquea onquempetuetaquempa maasanopae ipeacaaguetaacaca aisa, aatonica ochoocatimatajitsi avejancaguetajatsi-

neca. <sup>22</sup>Atsamajajiaqueroquea maasanopae ipeacaaguecaca Aapani Irioshi atsipeguitani oguijiaquequea oncantashitatiaanaquempaquea, quempetaqueate atsipevaetagueti manquigarentsi ocantaguetirogueti. <sup>23</sup>Cotanquitsiquea teequea aparo atsipetatsine ipeacaaguecaca Aapani Irioshi, atsipevaecaqueate aatimpajia aisa. Ichooashirentajiacaji Ishire Aapani Irioshi atsatantajiacaca incantashitajiacajaci Aapani Irioshi oncoramanitapojajegueti, cotanquitsiquea imaica atsipeshirentavaeguitani aguijacojiaca irojocajiacajiroquea Aapani Irioshi inintacaajiacajica maasano irijanijate, ampeamajaquempaquea irijanijate, incantashitajiajajaji aatoniji ametojatsinotaji. <sup>24</sup>Oraquea iroaqueragueti atsaroventajiacarigueti Quirishito atsajiaque oncoramanitapojajegueti ancantashitajiajanajempaquea aatoniji ametojaji, irootaquequea aguijajiaquea imaica. Cotanquitsiquea arimequea amenajiaqueromequea imaica irishinejiacajimequeate Aapani Irioshi aatomequea aguijacojiguiromequea, jac amenajiaqueromequea. ¿Arimpatenintanatsi aguijacojiaguitempani? ¡Aatoshine! <sup>25</sup>Cotanquitsiquea irooquea aguijacojiacaquea tequeratatac amenajigueroji, imaica netsana aguijacojiacquempaquea antsipetacojiacquempaquea maasanopae.

**Iquenquetsaventajiacaji Ishire  
Aapani Irioshi**

<sup>26</sup>Ariquea oquempeca aisa iriraquea Ishire Aapani Irioshi iramitacojiacaji intampishitacaajiacaji, teetari antampishijigueji. Aatimpajia amanajiguirigueti Aapani Irioshi teequea antsajigueji querocaca ancantajiguerini, cotanquitsiquea iroguentigueti ancantashirentajia-  
vequitempacea shirerrec inquenquetsa-

ventajiacaji Ishire Aapani Irioshi, incanqueriquea teeca agaveji aatimpa ancanteji. <sup>27</sup>Irraquea Aapani Irioshi amenamajatsicajiroca aquenquejajia-queca anintajiaqueca itsaqueroquea ininqueca Ishire, irooriji yamanacoventavaquenerigueti igomajamajerejia iroguenti iramanacovenqueneri inintaguetica Aapani Irioshi.

**Antampishitashijianaqueroqueate maasanopae**

<sup>28</sup>Aisa atsajiaque maasanoquea irantsipejiavetaquempaca pintsajigarica Aapani Irioshi osotoanaqueneriquea cameetsa, iriojiatari icajemajiaqueca onetsanatimentanaquempanijite inintaguetica Aapani Irioshi. <sup>29</sup>Paesatoniqui itsaqueroquea Aapani Irioshi queri tsaromentajiaquemparineca, jero icantantacarica oncoramanitapojajeguete inquememajiaquempariquea Irijanite, irijivajiaquerinijite iriatimpa iriguentijeguijiate incaramirincajia-vaegue jmm. <sup>30</sup>Irirajiaquea icanqueca inquememajiaquempariquea Irijanite icajemashirentajiaqueriquea cameetsa-niji intsaromentajiaquemparinijite. Irirajiaquea icajemashirentajiaqueca manaquea yamenajiaqueriquea quempeca teeca incovaeguishedimatempaji, iroompaquea iroganejencatacaajiaquempariquea.

<sup>31</sup>Iroosacanica imaica ishineventajiacaji Aapani Irioshi itsipsatipaicaji, ¿arimpate quericampate agavejajiacajineca? ¡Aatoshine queri agavejatsineca! <sup>32</sup>Irraquea teeca intsaneguempariji Irijanitemajaca, manaqueate itigaranca-queri imetojaventajiacaji, ¿aatompate yojocajiajirotsi aisa maasanopae cameetsaripae? <sup>33</sup>Aatimpajia iroguenti inintacaajiacaji Aapani Irioshi irashinta-

jiacaji. Imaica jac yashintajiacaji. ¿Arimpate quericampate cantajiacajineca chooca agovaeguisherejia? ¡Aatoshine queri agavejatsineca icantajiguitsi! Iriotaquequea Aapani Irioshi amenajiacaji quempeca teeca ancovae-eguishedimatempaji, <sup>34</sup>¿arimpate quericampate agavejanquitsineca inquempetacaantajiacaji incatsimajiacajinijite Aapani Irioshi? ¡Aato queri agavejatsineca! Iriotaquequea Quirishito Jesoshi metojaventajiacaji. Teequea aparo irimetojaventajiacaji, manaquea itancorejanaji aisa, imaica ichoocapojaji isenampijapojajari Aapani Irioshi itincamijempequiqui iquenquetsaventajiacaji. <sup>35</sup>¿Arimpate quericampate agavejanquitsineca irovashiantacaaitajeri Quirishito aatoniji ipintsamajajajaji icavintsajamajajiacaji? ¡Aatoshine queri agavejatsineca! Antsipevaevetaquempaqueate irooca ashimampoanacajiaivequempaquea, cotanquitsiquea iriraquea Quirishito incoquempaniquea impintsamajajiacaji incavintsajamajatanacaji. Iroocaquea irantsipetacaajiavetacaji itsipapae incatsimajiacajiquea intati, irooca antsipevaevequemparoquea atase, aricaca aatoquea ochoocaveta quero campate anquitsaajiaquempaca, irooca onchoocaguevetaquempaquea taaca opajita managuetanquitsineca, aisa ametojajiavetanajempaquea, cotanquitsiquea iriraquea Quirishito incoquempani impintsamajajiacaji incavintsajamajajiacaji. <sup>36</sup>Ocanque tioncanquitsica:

“Icantacoguitani inintajiaque irimetojajiaquenaquea yamenajiaquena-  
gueti notsaromentajiaquempiquea,  
inquempetacajiaquenaqueate oveja  
irooshipojiguete irijitorejajita-  
queri.”<sup>r</sup>

<sup>37</sup>Jero antsipejiavequempaquee quejeguetaaroca ocatita, cotanquitsiquea yagavejacaajiacajiqueate pintsamajajiacajica arimpaqueate antampishitashimajajianaqueroqueate maasanopae, caaviji anaamajatantajianaquemparoca maasanopae. <sup>38</sup>Irootaqueuea imaica naatimpa notsamajaque aatoquea queri agavejatsineca irovashiantacaqueriquea Aapani Irioshi aatoniji ipintsamajajajajajicavintsajamajajiacajaj. Aatoquea yagavejajiguiti irashivantijitete Aapani Irioshi. Ariquee iquempejiaca ampatsinipae aisa quericaca itsipapae majirontajjatsica, aatoquea yagavejajiat. Irooca ametojajia-vequempaquee, irooca choocotirajajigueti anchoocajiaje, incoquempani impintsamajajiacajaj. Ariquee oquempetaca maasanopae imaicatica aisa ocaraquigueta-nanquitsineca. <sup>39</sup>Ariquee oquempetaca aisa choocatatsica jenoqui, irooca isavijitica, aisa taaca opajitapae otsipapae ipeacaaguetaacaca Aapani Irioshi aatoquea agavejitsi ovashiantacaguiri Aapani Irioshi aatoniji ipintsamajajajajajaj, icoguitanitarite ipintsamajajajaj aatimpajia maasano tsaromentajiacarica Amajirote Quirishito Jesoshi.

**Aapani Irioshi inintacaajiaqueri  
ishiraerijia incavintsajamajajiaqueri**

**9** <sup>1</sup>Naatimpa naroguenti tsaromentarica Quirishito, aisa ichoocashirenquena-quea Ishire Aapani Irioshi. Irioquea nigaimoquenaqueate quero nococani noshirequi, irootaqueuea notsatantacaca imaica manaquee iroomajaca noncanquempana aatoquea notsojega intati. <sup>2</sup>Noshimampoancavaetaqueate noquenquejacotaquerigueti nogonorajia

teeca iraventajiguempariji Jesoshi, nocantacoguitani ocatsishirentavaetana-quea. <sup>3</sup>Nonintavecaquee nompiapiaita-jemparime napjioriojiate nashimajajia nogonorajia cameetsaniji naroguentiniji incatsimataque Aapani Irioshi, iriatimpajia irishetacojiaque, aisa naatimpa irovashiantaqueuea Quirishito, irioqueate impintsamajatanaquempaca incavintsajamajajiaqueri. <sup>4</sup>Irirajiaquee nogonorajia ichoviquijiani Ishiraeri iriguentiniji inintsijiacaca Aapani Irioshi coramani impeajia-queriquea irijanijiate. Iriatimpajiaquee itsipajia coramani, jero iquejetantacarica itsirencashimpoquirerejimojiaqueriquea cantavaetaque tsiren. Aisa iriguentijia yojocajiaqueneca Aapani Irioshi oratica paaquitopae,<sup>5</sup> icantajiaqueri intsaromentajiaquemparigueti incavintsajamajajiaqueriquea. Itioncacaanqueneriquea maasanopae inintagueueca irinetsanajiaqueca. Aisa itsatacaqueri Moishishini quero incojiaquempani intsaromentajiaquemparigueti ontaniqui Taverenacoroqui. Iroompa-quea icamanqueri aisa quero incojiaquerini incavintsajajiaquerigueti. <sup>5</sup>Iriatimpajia iriguentijia ichoviquijiani Averaameni, Ishaaconi, Jacovoni aisa irijanijiate. Ocoramanitapojaquegueti ivoapojaque Quirishito ocantiqui quepatsiqui, aisa iriguenti ichoviquitanaqueca, iriguentiquea Irioshimajaca, iriguenti ashintaguecaroca maasanopae. ¡Iintsijate incoquempanijate irishineventajiguitemparinijate! Ari oncoquempa.

<sup>6</sup>Iroosacania, ¿arimpate ancantajigue manaquee yamatavijajiaqueri Aapani Irioshi ishiraerijia, teequea irinetsanateroji icantajiaquerica coramani? Teequeate iramatavijajigueriji, teetarite maasano

---

s 9.4 Oraquee *paaquito* iroguenti icantamajajitirica itsipa irinetsanamajajitenerica. Ochoocaguetaqueuea paaquitopae iroquetinica icanquerica Aapani Irioshi caquintepae: chooca aparo icanquerica Noeni, otsipa icanquerica Averaameni, otsipa icantajiaquerica ishiraerijia ichoocaquegueti Moishishini, otsipa icanquerica Taavini.

ichoviquijiani Ishiraeri impeajiguempaji ishiraerijiamajaca irashimajaca Aapani Irioshi. <sup>7</sup>Ariquea iquempetacaajiacari coramani ichoviquijiani Averaameni, iquenquetsatacojiaquerigueti Aapani Irioshi teequea inquenquetsatacojigueriji maasano, irootaquequea icantantacarica Averaameni: “Iriguentiquea nocantacotsitacaca Ishaaco pinchoviquivaetantanaquempaca.”<sup>t</sup> <sup>8</sup>Irootaquequea atsatantajiacarica Aapani Irioshi teequea impeajigueriji ishiraerijiamajaca maasano ichoviquijiani Averaameni. Iriguentiquea peamajajianquitsica ichoviquijiani Ishaaconi, <sup>9</sup>iriotaqueetari icanqueca Aapani Irioshi coramani iquenquetsatacaquerigueti Averaameni icanqueri: “Ontsipatapojempagueti ajagantsini onquejetapojempagueti imaica, noncoraqueetajate namenajatempi, ariquea irivoaje oshiramparijaniquite Sara.”<sup>u</sup>

<sup>10</sup>Cotanquitsiquea teequea aparo onchoocateji ocatica. Irirajia irijanijiate Ireveca, apatiroti irijanincarica, iriotaquequea avaesatinite Ishaaconi. <sup>11-13</sup>Oraquea tequeratagueti ovojaigueriji, iriraquea Aapani Irioshi icanquero: “Iriraquea jivavetapojatsineca manaquea impejaitajeri iromperare carapojatsineca.”<sup>v</sup> Oraquea icanquerogueti Aapani Irioshi tequeratataraja impeacaguemparo cameetsatsica aisa covaeguishetatsica, tequeratatarajanica ovojaigueriji. Ariqueate icanque tioncarentsiqui: “Nopintsacariquea Jacovo, irirampani Esao nomanintaqueri.”<sup>w</sup> Irootaquequea itsatantajicaroca

maasanopae ocatica inchiquiojita icanque Aapani Irioshi iriatimpa queri inintacaqueca incoguique incavintsajamajaqueri, ariquea irinetsanamajaqueroquea maasanopae icanqueca. Teequea iroqueti iramenajigueriji ogameetsareni ipeacaaguecaca, inchiquiojita icajemashirentaqueri iriatimpa.

<sup>14</sup>Iroosacanica ¿querocaca ancantajigue imaica? ¿Arimpate ancantajigue teequeate intampaticateroji Aapani Irioshi, mana icoguiashitana intati? ¡Aatoshine! <sup>15</sup>Icanqueriqueate Moishishini coramani icanque:

“Quericaca noninque naatimpa  
nompintsatacoquempari  
nompintsatacoquempari-  
queate.

Aisa quericaca noninqueca noncavintsajamajaqueri noncavintsajamajaqueriqueate.”<sup>x</sup>

<sup>16</sup>Irootaquequea imaica teequea irooquea impintsatocotimentajiacaji iramenajiacajigueti inchiquiojita anintajiaque aatimpajia impintsatacojiajaji, irooca irooriji apanquenapanquenavaecaro antajiaque cameetsa, manaquea inchiquiojita ininque iriatimpa impintsatacojiajaji, irootaquequea ipintsatocotantajiacajica. <sup>17</sup>Itioncacojitaqueroquea aisa icanquerica Aapani Irioshi Paraone, icanque: “Manaquea nopeacaquempiquea majirontatsica cameetsaniji aviguentiniji intsantantajitaquempaca nagavejamajati, cameetsaniji intsavetacotimentajitaquenaniji ontsitacaguetejanaquemparo maasano quepatsi, intsavetacojitaqueroquea novajiro.”<sup>y</sup>

t 9.7 Jen. 21.12 u 9.9 Jen. 18.10. v 9.11-13 Jen. 25.23. w 9.11-13 Mara. 1.2-3. nomanintaqueri. Oguipitsocaquerogueti acaniqui “nomanintaqueri”, iguenquetsatsarequi guiriego agavejaque oncanque “nomanintaqueri” irooca “nosemacari”. x 9.15 Eeq. 33.19. y 9.17 Eeq. 9.16. Yomperaperaitacarigueti Paraone maasano ishiraerija ichoocajiaquegueti Ejepitoqui, Aapani Irioshi incantacaantaqueriquea Paraone: “Poguipaquijajerija nashintajiacaca”, cotanquitsiquea iquishoshirentanaque Paraone, tee inquemisanteriji, irootaquequea itigarancantacanarica Aapani Irioshi atsipetagantsipae caratanquitsica 10. Iquemacojiaqueroquea caquinteguetatsica itsatantajiacaca arimaja yagavejamajati Aapani Irioshi.

<sup>18</sup>Ariqueate iquempetaca Aapani Irioshi imaica. Ipintsatacojigari quericaca ininqueca impintsatacojiguempari, aisa quericaca ininqueca inquishoshirentacaqueri, ariqueate inquishoshirentacaitempa-riquea.

<sup>19</sup>Cotanquitsiquea arica chooca aparo cantenaneca: “Iroosacanica, oquempetacagueti imaica ¿queroquea oocani icatsimantantajiacarica Aapani Irioshi teeca intsariventajiguempariji? ¿Arimpate quericampate agavejanquitsineca incantashitajemparoquea icanqueca Aapani Irioshi?” <sup>20</sup>¿Arimpate quericampate aviatimpa cameetsaniji pimpigajenctavaquempari Aapani Irioshi? Pinquenquejeroja chomo quepatsinaqui ipeacajaitarogueti, ¿arimpate oncanqueri peacaacaroca: “¿Queroquea oocani piquempetanquenaca?” <sup>21</sup>Iiraquea vichajari ¿aatompate yagavejitsi impeacaaquempa taaca opajitapae inintaguequeca? Iraitsitempaquea apapitsaro iraaagarantsitemparoquea impeacaaguequemparo inintaguequeca, irooca cameetsamajatanquitsineca irishineventamajajitempaca, irooca aatoca ishineventamajajita.

<sup>22</sup>Ariquea iquempetaca Aapani Irioshi iriatimpa, inintavetacaquea ironigaanquero igatsimaca aisa iragavejane, cotanquitsiquea teequeate incatsimanteji taampina, manaquea yatsipetacovaejiacariquea ipeacaajiacaca catsimatacaajiaquerica teroncajianquitsinemeca. <sup>23</sup>Manaquea iquempetaca imaica cameetsaniji iramenajitaqueriniji caaviji yoganejencamajata icavintsajamajatan-tajiacarica ipeacajaiacaca inintacotsijiacaca paesatoniqui incavintsajamajajia-

queri cameetsaniji iramenajiajeroniji iroganejencaca. <sup>24</sup>Irootarite icajemashirentantajiacajica aatimpajia maasano, teequea aparo icajemashirentajigueriji joriojia, icajemashirentajiaqueri aisa teeca irijorijoigueji. <sup>25</sup>Ariqueate itionca-caaquerigueti Oseashini icanque:

“Irirajia teeca nashintajiavetemparij oncoramanitapojagueeti nashintajiajempari.

Ariquea inquempejiaquempa irira teeca irio novintsare, nompeaqueriquea novintsare.”<sup>z</sup>

<sup>26</sup>“Querocagueti oraniqui ichoocajiaqueni nocantajiavecaca: “Teequeate nashintajiguempiji’, ariquea oraniqui inquenquetsatacojitaqueri incantajitaque: ‘Iriguenti irijanijiate Aapani Irioshi anijatsica.’”<sup>a</sup>

<sup>27</sup>Cotanquitsiquea Isaiashini itionca-cojiaqueri ichoviquijiani Ishiraeri icanque:

“Incaramirincajiavetanaquempa-quea ichoviquijiani Ishiraeri inquempejiavetanaquemparoquea impanequi ocaratsapijajia-quitica inirojani quentijiani, cotanquitsiquea iriguentijiani choocajiajatsineca apaopae irajiajavajeca Aapani Irioshi.

<sup>28</sup>Irinetsanamajaqueroqueate Amajirote icanqueca coramani, catsiqueti incatsimatimentajiaqueri-quea quepatsiquitica igovaegui- sherejia, intampaticamajatero-quea.”<sup>b</sup>

<sup>29</sup>Ariqueate icanque aisa Isaiashini coramani icanque:

---

y 9.17 Eeq. 9.16. Yomperaperaitacarigueti Paraone maasano ishiraerijia ichoocajiaquegueti Ejepitoqui, Aapani Irioshi incantacaantaqueriquea Paraone: “Poguipaquijajerija nashintajiacaca”, cotanquitsiquea iquishoshirentanaque Paraone, tee inquemisanteriji, irootaquequea itigarancantacanarica Aapani Irioshi atsipetagantsipae caratanquitsica 10. Iquemacojiaqueroquea caquinteguetatsica itsatantajiacaca arimaja yagavejamajati Aapani Irioshi. z 9.25 Os. 2.23. a 9.26 Os. 1.10. b 9.28 Is. 10.22-23.



“Aatomegueti ipintsatacojiajime-  
queate Agavejamajatatsica  
Imajirojiate caramirincajiatsica,  
interoncamajajiacajimequeate  
maasano,  
anquempejiaquemparimequea  
guintenijavetatsica coramani  
Soromaqui,  
anquempejiaquemparimequea aisa  
Gomoraquitica.”<sup>c</sup>

**Irirajia joriojia teequea**

**irishineventajiguempariji Jesoquirishito**

<sup>30</sup>Iroosacanica ¿querocaca ancanta-  
jigüe imaica? Atsajiaquequea irirajia  
teea irijorijoigüeji teequea inquenque-  
jajavetempaji quero incojiaquempani  
cameetsaniji irishineventajiaquempari-  
niji Aapani Irioshi, cotanquitsiquea  
imaica yamenajiaqueri quempeca tee-  
a incovaeguishetimatempaji, yaventaven-  
taicaritari Jesoquirishito. <sup>31</sup>Irirajia  
ishiraerijia iroguenti yoguijaguijaveca  
icanqueca Aapani Irioshi itioncacaanta-  
jiaquenerica, inintajivecaquea irinetsa-  
najaqueromequeate cameetsaniji  
irishineventajiaquempariniji Aapani  
Irioshi, cotanquitsiquea teequea  
iragavejajigüeji. Oraquea irinetsanajia-  
queromegueti maasanopae, ariquea  
iroguenti irishineventajiaquemparime-  
queate Aapani Irioshi. <sup>32</sup>¿Queroquea  
ococani teea irishineventajiguempariji  
Aapani Irioshi? Manaquea yaventaven-  
taicaroquea itioncacotanaqueca  
Moishishini inintajiveca irinetsanama-  
jajiaqueromequea cameetsanijite  
irishineventajiaquempariniji Aapani  
Irioshi, teequea iro irinintajigüeji  
iraventaventaiquempariquea Quirishito,  
icomijiacariqueate. Irootaquequea  
itsavetacotantajitarica Quirishito

iquempetacaajitacari mapi tivatanta-  
tsica. <sup>33</sup>Jero itioncacotantajitarica  
coramani ocanque:

“Oncoramanitapojajeguete nojoqui-  
jique mapi ontaniqui  
Shionequi,  
manaquea intivatantajitaquempari-  
quea,  
cotanquitsiquea quericaca  
avenquemparoneca aatoquea  
yoguijashiventajitiri, aatonica  
yaventashitarotsi intati.”<sup>d</sup>

**10** <sup>1</sup>Napitsaroverarijiate, caaviji  
nonintamajaque irishetacoji-  
queri nogonorojia ishiraerijia, iroo-  
quea nocanqueri namanaqueriguetei Aapani  
Irioshi. <sup>2</sup>Naatimpaquea namenajiaqueri  
arimajaca inintajiveca intsaroverama-  
jajiaquemparimequeate Aapani Irioshi,  
cotanquitsiquea teequea intsajigüeji  
taaqueueate ininque Aapani Irioshi,  
manaquea omanimojiacari. <sup>3</sup>Teequea  
intsajigüeji querocaca incojiaquempani  
cameetsaniji Aapani Irioshi iramenajia-  
querinijite quempeca tee-  
a incovaeguishetimatempaji, iroguentiquea  
inintajiveca inchiquiojita irishinetacaajiaquem-  
pari iriatimpajia. Teequea irinintajigüeji  
iraventaventaiquempari cameetsaniji  
Aapani Irioshi iramenajiaqueriniji  
quempeca tee-  
a incovaeguishetimatem-  
paji. <sup>4</sup>Iriratari Quirishito inetsanataco-  
majaqueroquea Icantacaantaqueca  
Aapani Irioshi itioncacotanaqueca  
Moishishini, icaratacaapojajiro irigoma-  
jaretacaajanajempariniji maasano  
aventaventaiquemparineca.

<sup>5</sup>Iriraquea Moishishini itioncacojia-  
queri nintajivetanquitsica irinetsana-  
majaqueroquea icanqueca Aapani  
Irioshi cameetsaniji iramenajiaqueriniji  
quempeca tee-  
a incovaeguishetimatem-

**c 9.29** Is. 1.9. Pamenero Jen. 19.24-29. **d 9.33** Is. 8.14; 28.16. Pamenero 1 Pe. 2.4, 6-8 aisa Irc. 20.17-18.

paji, icanque: “Irraquea netsanamajaque-roca maasano ocajia, irooquee iranijantajempaca.”<sup>e</sup> <sup>6</sup>Cotanquitsiquea quericaca aventaventaiquemparineca Quirishito cameetsaniji irigomajaretacaanajempariniji, aatoquea icantashirentitsi: “¿Quericampate atsomajanquitsineca jenoqui inquitequi?” iraguijitaapaoquea Quirishito. <sup>7</sup>Ariquea oquempetaca aisa aatoquea icantitsi: “¿Quericate oanancuquitsineca isaviji oagantavaequegueti ichoocajiguigueti metojari?” intancorejajerime Quirishito iramajerime.<sup>f</sup> <sup>8</sup>Iroosacanica, ¿querocampate ocanqueni Tioncarensimajaca? Manaquea ocanque: “Oraquea icanquea oquempejimajuempim, ochoocavagantetaquempim aisa ochoocashirentempim.”<sup>g</sup> Irootaquequea notsavetantajiguica naatimpajia aisa nocantajiaquempica: paventaventaiquemparija Quirishito cameetsaniji irishetacojiaquempiniji Aapani Irioshi. <sup>9</sup>Pincanquegueti pivagantequi: “Jesoshi iriguenti Majirontamajataatsica”, aisa pintsashirentamajaquegueti iroomajaca ivochatajiri Aapani Irioshi imetojavecaqueti, ariquea iroguenti irishetacotaquempiquea Aapani Irioshi. <sup>10</sup>Irootarite ashire antsashirentamajaquempaca iroomajaca aventaguitempariniji irigomajaretacaantajicajica, aisa irooquee avagante ancantantempaca: “Iriguenti Majirontamajataatsica”, irishetacotantajiacajica. <sup>11</sup>Ocanquequea Tioncarensimajaca: “Quericaca avenquemparineca iriatimpa, aatoquea yoguipashiventimajitiritsi, aatonica yaventashitiritsi intati.”<sup>h</sup> <sup>12</sup>Oraquea icanquegueti imaica, iriguenti icantajiaque maasano caquinteguetsica, iriatimpa yamenajiacajiquea ajamirincajiaque, aquempeta-

vacaajia joriojia aisa teeca irijorijoi-gueji, iriguentitari Amajirote maasano. Jero caaviji icavintsajamajiacajia maasano cajemajianaquerica. <sup>13</sup>Aritarite “maasano aventajiaquemparoneca ivajiro Majirontamajataatsica, irajiajaveri.”<sup>i</sup>

<sup>14</sup>Cotanquitsiquea aatogueti itsajiguiritsi iriguenti itigarancaquea Aapani Irioshi ¿querocampate incojiaquempani incajemantajiaquemparica iravajerinijite? Aisa aatogueti iqemacojiguiritsi, ¿querocampate incojiaquempani iraventantajianaquemparica? Aisa aatogueti itsavetantimojitiritsi, ¿querocampate incojiaquempani inquemacotantajiaquemparica? <sup>15</sup>Aatogueti ichoocatitsi tigarancajiaquerineca, ¿querocampate incojiaquempani iroaroaitantanaquempac aintsavetante? Ariquea ocanque tioncanquitsica: “¿Cameetsaguitivaeque iguiti amiroca quenquetsatsarensi oguishinejantatsica tsaventanqueroca cameetsaguetatsica!”<sup>j</sup>

<sup>16</sup>Cotanquitsiquea itsavetantimojivecari, teequea maasano inquemisantajigueroji Quenquetsatsarensi Oganejencatatsica. Aritari icanque Isaiashini coramani: “Nomajirote, ¿choocampate quemisantaqueroca notsavetantimojiaquerica incantantaquempaca: ‘Iroomajaca?’”<sup>k</sup>

<sup>17</sup>Irootaquequea nocantantaquempica, anquemajiaquegueti itsavetantajitaqueca agavejaque aventaventaiquempari Quirishito. Iroguentiquea anquemajia-vaque icanquea Aapani Irioshi.

<sup>18</sup>Cotanquitsiquea naatimpa nocanque: Iroosacanica, ¿teecacajate inquemajigueroji? ¡Iquemajiavecaroguea! Otioncatatari ocanque:

e 10.5 Irev. 18.5. f 10.6-7 Ireo. 30.12-13. g 10.8 Ireo. 30.14. h 10.11 Is. 28.16. i 10.13 Joere 2.32. j 10.15 Is. 52.7. k 10.16 Is. 53.1.

“Yoayoaitanaquequea tsavetantajia-tsica itsitacaguitejavaetanaque-roquea maasano quepatsipae, iquemajivaqueriquea itsavetantimojiaquerigueti ocaraguepoja-quegueti.”<sup>l</sup>

<sup>19</sup>Cotanquitsiquea noncantsijajempiqueate aisa: ¿Aricajate iroocajate cotanquitsiquea teecajate inquemajigueriji ishiraerijia taaca opaji icantajia-quea irirajia tsavetantimojiaquerica? ¡Iquemajivaqueate!, cotanquitsiquea teequea irishineventajiguemparoji icamantajivecarica. Itioncacotanaquero Moishishini coramani icanqueca Aapani Irioshi, icanque:

“Pincatsimatacotsitaqueri itsipajia teeca irigonorontavacaajiguempaji noncavintsajajia-querigueti.

Noncatsimatacaaquempiri caquinteja teeca intsajavetempaji.”<sup>m</sup>

<sup>20</sup>Iroompaquea Itsaiashini teequea intsarogueji, tampatica yoaquero-quea itioncacocueroquea icanqueca Aapani Irioshi iquenquetsatacojia-querigueti teeca irishiraerijiate, icanque:

“Irirajia teeca inquenquejajivate-naji intsajiaquenani, imaica itsajiapojajana.

Ariquea iquempejiaca irirajia teeca incoacojiavetenaji, imaicaquea imaica naatimpa notsatacaajiaqueri quero nocotani.”<sup>n</sup>

<sup>21</sup>Oraquea itioncacotaqueroquea icanqueca Aapani Irioshi iquenquetsatacojiaqueri ishiraerijia, icanque:

“Nocajemavacoveguitarini caquinteja pigapigatsatantenerijia, eeshotia inaque.”<sup>o</sup>

**Inconoagarantajiaquempaqueea ishiraerijia choocagarantajatsineca tsarorentamajajianaquemparineca Aapani Irioshi**

**11** <sup>1</sup>Iroosacanica imaica nocanque: ¿Aricajate yovashiantajianajiri Aapani Irioshi maasano ichoviquijiani Ishiraeri icantajiavecaca: “Iriguenti nashijia”? ¡Teequeate! Pamenejate naatimpa naroguenti igonorona ishiraerijia, iriguenti choviquitanaquena Vejamine ichoviquini Averaameni, cotanquitsiquea iriraquea Aapani Irioshi teequeate irovashiantanajenaji. <sup>2</sup>Ariquea iquempejiaqueri nogonorojia teequea irovashiantajianajeriji, itsatsitacariquea coramani, icoguiajiaqueri, ariquea imaica icocani yashintajiacari. Pitsajiguirotarite itioncacojitaquerigueti Iriashini iquenquetsatacaquerigueti Aapani Irioshi, icamanqueri quero icoguishejiacani ishiraerijia, icanqueri: <sup>3</sup>“Nomajirote, iteroncaciaqueriquea imetojajiaqueri tsavetantajatsica pitigarancuimojiavecarica. Aisa ipishonquitaguequempiroquea paretaretepa. Aparoquea nochoocataji naatimpa, cotanquitsiquea isariimenquenaro irimetojajiaquena.”<sup>p</sup> <sup>4</sup>Cotanquitsiquea ¿quero icanqueri Aapani Irioshi? Icanque: “Noquemponguijajiriquea 7,000 shiramparjia tsarorentamajaquenaca teeca irogueroventempariji Vaare ipeajiaqueca pigonorojia irioshitashijiacaca.”<sup>q</sup> <sup>5</sup>Ariquea oquempetaca imaica ichoocajiaque apaopae tsarorentajiacarica Aapani Irioshi, inchiuiojita icavintsajamajajiaqueri iriatimpa, iriotari cavintsajanteneri, icoguiajiaqueriquea cameetsaniji intsarorentajiaquemparinijite. <sup>6</sup>Teequea irooquea incavintsajimentajia-queriji yamenavecagueti icomajavaeca

l 10.18 Sar. 19.4. m 10.19 Ireo. 32.21. n 10.20 Is. 65.1. o 10.21 Is. 65.2. p 11.3 1 Maj. 19.10, 14. q 11.4 1 Maj. 19.18.

iriatimpajia, manatari intati icavintsajashijiacari iriatimpa. Aatomegueti oquempetaca imaica, aatomequeate otampaticatime igavintsajantanterini Aapani Irioshi.

<sup>7</sup>Iroosacanica, ¿querocampate ocoani? Manaquea oquempetaca imaica. Iriraquea ishiraerijia inintajia-veca irishineventajivaquempari Aapani Irioshi, cotanquitsi teequea irishineventajigueriji maasano, manaquea ishineventajiacari icoguiajiaquea paesatoniqui irashintajiaquempari. Irirajiaquea igonorojia arimpaquea iquishoshirentajianaque.<sup>r</sup> <sup>8</sup>Ariquea itioncacojiquero coramani ocanque:

“Aapani Irioshi imaguempishirentacaitsijigari.

Yoquijatacaitsivetari, teequea irinejantajiguemparoji.

Iguempitatacaitavetari, teequea inquemantemparoji.

Icocaniquea iquempejiaca coramani arejevaetanacaquea imaica.”<sup>s</sup>

<sup>9</sup>Aisa icanque Taavini:

“Irishecashecaivequempagueti irivara-cajiterita ontsatojiguerita.

Intivativaitempata, onquejetacaa-jemparita icatsimavecaca.

<sup>10</sup>Impeacaitsijitemparita teeca iramenimateji.

Omititsatacaaguitemparinita yantaguishequea.”<sup>t</sup>

**Aapani Irioshi ishetacojiaqueriquea teeca irijorijoigueji**

<sup>11</sup>Imaica noncanque: Iroosacanica ariqueate iquempejiacaguetei imaica joriojia teequea irinintajigueji intsaro-

ventajiaquempari, ¿arite yovashiantamajianaqueri Aapani Irioshi aatonijite ishetacojiguiritsi? ¡Teequeate! Arimpaquea iquempejiacaguetei imaica teequea intsarorentajiguempariji irootaquequea ipitsocashitantajiacarica itsipapae teeca irijorijoigueji irishetacojiaqueriniji cameetsaniji irinintajiaquenijite joriojia impitsocashijiaquempari inquejetsijia-jempariquea iriatimpajia aisa incavintsajamajiaqueri irishetacojiaquerinijite. <sup>12</sup>Oraquea teequea intsarorentajiguempariji iriatimpajia joriojia, irooquea oshimerancantapojaca icavintsajamajaqueriquea maasano caquinteguetatsica. Aisa inintaveca Aapani Irioshi incavintsajamajiaquerimequea joriojia, irishetacojiaquerimequeate, cotanquitsiquea teequea irinintajigueji, irootaquequea oshimerancantapojacaca icavintsajamajaqueri teeca irijorijoigueji ishetacojiaqueri. Oquempetaca imaica oshimerancantapojacaroquea icavintsajamajiaqueri teeca irijorijoigueji, iiroompaqueate intsarorentajiaquempariguetei iriatimpajia joriojia, caavijiquea oshimerancantamajaquemparoquea incavintsajamajaqueriqueate iroshequiamajatatiguenimaja!

<sup>13</sup>Cotanquitsiquea piconoagarantajiacaquea teeca aviguentijia joriojia. Imaica noninque noncantajiaquempi iriguenti tigarancaqueanaquea Aapani Irioshi noanaquequea nontsavetantimojiaqueri pigonorojia, irootaquequea noshineventancaroca nosavicueta-majatantaroca, <sup>14</sup>namenacquetari aricaquea iramenajiaquempiquea

r 11.7 Pamenero 9.32: “¿Queroquea ocoani teeca irishineventajiguempariji Aapani Irioshi? Manaquea yaventaicaaroquea itioncacotanaquea Moishishini inintajiaveca irinetsanamajiaqueromequea cameetsanijite irishineventajiaquempariniji Aapani Irioshi, teequea iro irinintajigueji iraventaitaquempariquea Quirishito, icomijiacariqueate. Irootaquequea itsavetacotantajiacarica Quirishito iquempetacajiacari mapi tivatantatsica.” s 11.8 Ireo. 29.4; Is. 29.10. t 11.10 Sar. 69.22-23.

nogonorojia pitsaromentajiacari  
 Quirishito aviatimpajia, ariquea  
 irinintajiaque impitsocashijianaquem-  
 pari Aapani Irioshi incavintsajamajajia-  
 querija iriatimpajia aisa, cameetsaniji  
 inquempejianajempinijite aviatimpajia  
 irishetacogarantajiqueru. <sup>15</sup>Oquempe-  
 taca imaica oshimerancantacaroquea  
 icatsimajiaquerigueti Aapani Irioshi  
 joriojia iroquea ipitsocashijianaca teeca  
 irijorijoigueji imeshiajaqueru, arimpa-  
 queate intsaromentajianaquemparigueti  
 joriojia caaviji oshimerancantapojajem-  
 paroquea irishineventajiaquempariquea  
 Aapani Irioshi iriatimpajia aisa, irisheta-  
 cojiajeriquea. Iroaqueragueti quempetacari  
 manaca imetojajiaveca, cotanquitsiquea  
 irimeshiajaquerigueti ariqueate onquempe-  
 taquempa ipochajianaji.

<sup>16</sup>Nonquejetacaguempiroja irojocagaran-  
 tajitenerigueti Aapani Irioshi capichase  
 ose pan iroquetica impeacajitempaca,  
 iramenajiqueroquea maasanose irashinta-  
 coquemparo Aapani Irioshi. Ari oquejetaca  
 aisa irashintaquemparogueti Aapani Irioshi  
 ovarishitsa inchato, maasanoshimpoqueja  
 irashintacoquemparo. <sup>u</sup>

<sup>17</sup>Irraquea joriojia teeca intsaromenta-  
 jiguempariji manaqueate iquempejiacaro-  
 quea ojempequipae orivo ometojajempe-  
 quitigueti icaratsijitaro quea ipishon-  
 quitajitaro. Iroompaquea yaashitsijitaro-  
 quea orivojempequiniro yovinchacuetsi-  
 tantajitajaro cameetsaniji anijacaavaje-  
 roniji oviare. Cotanquitsiquea maasano  
 aviatimpajia teeca pijorijoigueji, mana-  
 quea piquempejiacaro orivojempequiniro  
 yovinchacantajitarogueti metojajempe-  
 quivetanquitsica. Aviguentiquea ipitsoca-  
 shijia Aapani

Irioshi ishetacojiajimpiquea, yanijaca-  
 shirentajiaquempi aviatimpajia, teetari  
 intsaromentajiguempariji joriojia.

<sup>18</sup>Cotanquitsiquea inchiqiojita piseme-  
 jiguitsijate pamenajiaque panaajiaque-  
 riquea iriatimpajia, aviguentijiaquea  
 ishetacojiaqueca Aapani Irioshi. Piseme-  
 jiaquegueti iintsija pinquenquejajigüe-  
 roja iriquetiquea tsaromentacari  
 coramani Averamen, iroquea oshime-  
 rancantantacaroquea pitsaromentajiacari  
 aviatimpajia imaica, teequea aviquetica  
 tsaromentajiguemparine. Pameneja orivo  
 teequea iroquea anijacagueroneca  
 ojempequi, iroguenti anijacaguroquea  
 ovarishitsa.

<sup>19</sup>Iroompaquea arica pincante: “Picantama-  
 jataque, cotanquitsiquea icatsimajia-  
 queru Aapani Irioshi joriojia teeca  
 intsaromentajiguempariji, naroguenti-  
 queate ipitsocashijiaji irishetacojiaje,  
 quempetaca icarajitirogueti metojajem-  
 pequivetanquitsica iroqueate iquejeta-  
 cantajitajaro yovinchacantajitajaro-  
 quea orivojempequiniro.” <sup>20</sup>Arimajata-  
 rite, cotanquitsiquea teequea incatsima-  
 tashijiguempari Aapani Irioshi intati,  
 iroguentiquea icatsimatantajiacarica  
 yamenaqueriquea tee iraventempariji.  
 Aviatimpa manaquea paventajianacari,  
 irotaquequea ishetacotantajiaquem-  
 pica. Jero noncantantaquempica imaica  
 aatoja pisemejiguitsija, manaquea  
 pintsarorajiaque. <sup>21</sup>Iquejetacaru-  
 gueti Aapani Irioshi orivojempequimajaca  
 icaratsitaro, ¿arimpate aato iquejetacai-  
 tarotsi orivojempequiniro? Aviguentijia  
 ocantacoque piquejejiacaro orivojempe-  
 quiniro.

<sup>22</sup>Iintsija pamenejate intati. Caaviji  
 incavintsajantamajati Aapani Irioshi,

**u 11.16** *Capichase ose* ocantacoqueru i vaesatiniteni joriojia iriquetinica tsaromentajiacarica Aapani Irioshi, *maasanose* ocantacoqueru ichoviquijianaquea iriatimpajia. Ari oquejetaca ovarishitsa inchato ocantacoqueru i vaesatiniteni joriojia.

cotanquitsiquea aisa caaviji incatsimaji-aqueri covaeguisherijia. Irootaquequea icatsimatantajiacarica joriojia tivashirempojatsica, aviatimpa manaquea icavintsajamajaquempiquea, cotanquitsiquea pincoquempanija pintsaromentamajatanauemparija cameetsaniji incoquempaniniji incavintsajamajaquempiquea. Oraquea aatogueti piquempetirotsi imaica, incatsimaquempiquea aviatimpa aisa, pinquempetaquemparoquea metojajem-pequiro icarajitica. <sup>23</sup>Iriatimpajiaquea aatogueti icancani iquenquejajaji: “Aato naventari”, iriraquea Aapani Irioshi inconoacaantsijajempariquea irapijoriojiate tsaromentajiacarica, onquempetajemparo ivinchacantajitajarogueti ojempequi inchato, yagaveja-quequea iriatimpa irivinchacantajajem-para. <sup>24</sup>Pinquenquejajeroja orivojempe-quinero, yaajivaequitiroquea ontaniqui otsoroashitanacagueti, yamajiro ivinchacampojajaro orivomajaca iniganquitejirequi. Imaica iramanajero-gueti ojempequimajaca icarajivetacaca choocaturaja teequea ometojamajateji, taampina iraitsitemparo irivinchacanta-jemparo ashimajaca ova. Quempeca aviatimpa ariqueate ishetacotimpiquea Aapani Irioshi itsipatacaajiaquempiri maasano tsaromentajiacarica, iriempa-queate joriojia intsaromentajiaquempari-gueti caaviji intsipatacaantajiaquempari igonorojia tsaromentajiacarica coramani.

**Ishiraerijia iraventajianajempari Aapani Irioshi**

<sup>25</sup>Imaica, napitsaromentarijiate, noninque pintsajiaqueroquea teeca intsajivetemparoji coramani cameetsa-niji aatoniji pisemejiguitsi pincantaji-que pitsajigui. Iconoagarantajia

ishiraerijia iquishoshirentajianaque, cotanquitsiquea oncoramanitapojaje-gueti intsaromentajiaquempari-gueti maasano teeca irijoriojioqueji tsaromenta-jianquitsineca, ariquea aato iquempe-jiaya imaica. <sup>26</sup>Onquempetanaquempa-gueti imaica ariquea irishetacojiqueri-quea maasano ishiraerijia, ariquea ocanque Tioncarentsimaajaca:

“Incoraquetaque Ompetantatsica irisotoantapojemparo Shionequi,

irovashiantacaajipojajeri icovae-guishejiacagueti ichoviquijiani Jacovo.”<sup>v</sup>

<sup>27</sup>“Irootaquetari nocantajiaquerica nonetsanajiaquenerica noshetacojiaquerigueti igovaegui-shere.”<sup>w</sup>

<sup>28</sup>Irirajia nogonorojia joriojia tee irinintajiajavero Quenquetsatsarentsi Oganejencatatsica irootarite icatsimati-mentantarica Aapani Irioshi, cotanquitsi-quea imanintaquerogueti irooquea amishirentantajimpica aviatimpajia teeca pijoriojioqueji itsavetantimojitaquempiro-tari. Cotanquitsiquea iroorijite icoguiaco-vaequeri ivaesatiniteni irashintajiaquempa-riniji, icocaniquea ipintsajajari. <sup>29</sup>Aritarite aatoquea icantashitatijaarotsiquea Aapani Irioshi icanqueca. Taaca opaji irojocajiacaji aatoquea yaapitsajajajirotsi. Ariquea oquempetaca quericaca icajemshirentajia-queca aatoquea icantiritsi: “Teetari noncajemempinica.” <sup>30</sup>Oraquea coramani aviatimpajia teequea pinquemisantajia-ve-tempariji Aapani Irioshi, cotanquitsiquea iriatimpa ipintsatacomajaquempiquea imaica, yamenajiaqueritari joriojia teequea inquemisantajigueriji. <sup>31</sup>Ariqueate iquempejiaca iriatimpajia imaica teequea inquemisantajigueriji, cotanquitsiquea oncoramanitapojajegueti impintsatacojia-

quempariquea Aapani Irioshi inquempeta-caajiaquempiquea aviatimpajia ipintsata-cojiaquempigueti. <sup>32</sup>Yamenajiaqueriquea Aapani Irioshi icovaeguishejiaca maasano caquinteja, teequea inquemisantajgueriji, irootaquequea icantantacaca: “Ari icojiaca maasano caquinte.” Manaquea iquempeta-caajiacari imaica cameetsaniji impintsata-cojiaquemparinijite maasano incavintsajajiaqueri.

<sup>33</sup> ¡Jeejeguitatsi, caaviji icavintsajantamajati Aapani Irioshi!

¡Caaviji itsamajati, itampaticamajatiro maasanopae!

Aatoquea atsajiguirotsi iquenejaguetica iriatimpa, ariquea oquempetaca aisa aatoquea atsajiguitsi quero icotani iriatimpa.

<sup>34</sup> “¿Quericampate tsatiroca iquenejaguetica Aapani Irioshi? ¿Quericampate agavejanquitsineca intsatacaqueri?”<sup>x</sup>

<sup>35</sup> “¿Quericampate agavejanquitsineca irojocaqueneriquea taaca opajitapae cameetsaniji iroguipiantajate iriatimpa?”<sup>y</sup>

<sup>36</sup> Maasanoquea yamenajiguetica iriguenti peacaaguecaro, aisa iriguenti tampishitacaaguetroquea, iriotaquequea ashintaguecaro quea maasanopae.

Irioshiatsi antsarorentamajatem-paca, ancoguitempaniquea ancantajiaqueri: “¡Caaviji poganejencamajataca!” Ari oncoquempa.

**Pimpaquerija Aapani Irioshi pitsino**

**12** <sup>1</sup>Imaicaquea imaica, napitsarorentarijateni, aritaquequea ipintsatacojiaquempi Aapani Irioshi, irootaquequea nocantantajiaquempica

iintsishiatsi pimpaquerija pitsino, pinquejevequempariquea viratsi imetojajiquenerica, cotanquitsiquea aviatimpajia panijimojianajiri, pincomajamajaventanajempari pishinetacajemparinijite, irootarite pintsarorentashirentantamajaquemparica. <sup>2</sup>Aatoja piquejejjajaritsijate choocajanquitsica imaicatica quepatsiqui, manaquea piroaqueraquenquejanetanaje pincantashitatananajempaca, cameetsaniji pintsajiaqueniji oganejencaropae inintaguetica Aapani Irioshi, iroguentitari shinetacaantatsica, oganejenca-vaeca.

<sup>3</sup>Irraquea Aapani Irioshi icavintsajaquea quea inintacaaquea nontsavetantimojiaqueri maasano, irootaquequea imaica nocantantajiaquempica aatoquea pisemejiguitsi pincantajiaque: “Nanaaqueri itsipapae”, manaquea iroquetiquea pamenamajaquempa apaniropae quero picojiacani cameetsaniji pintampaticamajaqueroniji poaqueroquea. Irooquea pamenuquempa quero picojianacani yagavejacaquempigueti Aapani Irioshi paventajiaquemparigueti: irooca pitampishitashimajatanaquero paventacariqueti, irooca mana paventavetaquitari capichaji. <sup>4</sup>Quempetaca aatimpajia chooca acojia, aquijsajia, aguitijia, maasanopae. Teequea ariquea onquem-pemajatemparoquea ogonoropae, apaniropae ocantashitajiaica. Pameneroja acotsi manaquea yajiricantajicaro, oraquea oquijantsi manaquea yamenantajicaroquea, irooquea guititsi manaquea yanijitantajitaroquea.

<sup>5</sup>Ariquea aquempejiaca aatimpajia tsarorentajiacarica Quirishito, acaramirincavaevaca cotanquitsiquea iriatimpa yamenajiacaji aparo achoocajiaque,

aquempejiacarouea itsino apatsinoro ocantaca, ariqueate atsipatavacaajiaca atsarorentajiacari. <sup>6</sup>Aapani Irioshi icantashitatiacaajiacaji apaniropae yagavejacaajiacaji. Taaca inintacaajiaca-jica iriatimpa antajiaqueca yagavejacaajiacaji. Choocaguetei aparo irooguetei yagavejacaquerica intsavetantero icanquerica, iintsija intsavetanteroja, cotanquitsiquea incoquempanija iraventanaquempari. <sup>7</sup>Irooguetei yagavejacaquerica iramitacotantavaequetei, intampaticamajaqueroja iroaquero iramitacotantavaequetei. Irooguetei yagavejacaquerica intsatacaantantaquequea, irooquee irisavicaventaque intsatacaantantavaeque. <sup>8</sup>Ariquea oquempetaca irooguetei yagavejacaquerica intampishitacaantantaque, irooquee irisavicaventaque. Ariguetei icanqueri Aapani Irioshi incavintsajajiaqueriquea irapitsarorentarijiateni irojocagarantajiaqueneri yashintaguecaca, cameetsavaeque irojocajiaqueneriquea aatoquea itsanea-pitsaritsi. Irooguetei yagavejacaquerica irijivajivaitante, cameetsaja iroaquero. Irooguetei yagavejacaquerica impintsatacoquempariquea atsipejianquitsica, irishinevaequempaquea incavintsajiaquetei.

**Quero incojiaquempani  
tsarorentamajatarica Aapani Irioshi**

<sup>9</sup>Pimpintsamajatantempaja, aatoquea pipintsatanamampega intati. Pisemaquemparoja covaequisherentsi, quisho poaqueroja cameetsaripae. <sup>10</sup>Pimpintsamajaquemparijate papitsarorentarijiateni, pinquempetacaamajaquemparija iriguentica pignonromajaca. Pamenajiaquerijate yanaajiaquempiquea pishineventajiaquempari. <sup>11</sup>Taaca opaji pantajiaque aatoquea peeshojiguitsi, manaquea pishineventajiaquemparoquea,

pitsajiaque iriguenti pantajiaquenequeate Amajirote. <sup>12</sup>Pishinevaequempaqueate pincanquempa, pitsajiaquetari irinetsanaqueroquea Aapani Irioshi inintacotsijiaquempanica incavintsajajiaquempiquea. Cameetsavaeque pantsipe-tacovaequempari taaca opaji pantsipejiaquempanica, picancanija pamanapiniqueriquea Aapani Irioshi. <sup>13</sup>Pincavintsajajiaqueriquea igomajamajarejia Aapani Irioshi coguitejacojianquitsica, pojocagarantajiaqueneri icoguitejacojiacaca. Querica arejetimojiguimpica paacameetsatavaqueri.

<sup>14</sup>Pamanacoventajianaquerijate atsipetacaajiaquempanica. Aatojate picantiri Aapani Irioshi: “Pincatsimati-menteri”, manaquea pincantsitempariquea: “Pincavintsajeri.”

<sup>15</sup>Pamenaqueriguetei pignonoro irishinevaequempaquea, pishinevaetanaquempaquea aviatimpa aisa. Oraquea pamenaqueriguetei ishimampanjancavae, pishimampanjancacotanaquempariqueate aviatimpa.

<sup>16</sup>Aatoja picatsimatavacajiatensi, cameetsaja paavacaajiaquempanija. Aisa aatoja pisemetimatitsi, manaquea pinconoajiaquemparija teeca iranaanteji. Aatoquea piquenquejajiguitsi: “Notsamajati nocanca.”

<sup>17</sup>Querocaguetei incoquempani itsipa, aatojate pipigajigaritsijate. Pincomajamajajiaquempanija pinchoocajiaqueneri cameetsa, iramenajiaquempanijate maasano arimajaca otampaticataque picomajamajajica teequa pamatavijanteji. <sup>18</sup>Ariguetei pagavejaja, pivetsinantavacaajiaquempanija paavacaimentajiaquempanija. <sup>19</sup>Napitsarorentarijiateni nopintsamajataca, aatoquea pipigatanta, manaquea poguijjavaquero igatsimare Aapani Irioshi. Otioncatari: “Icanque Amajirote: Naro ashincaro pigamen-



tagantsi, naroquea vegaratacaaque-rine.”<sup>z</sup> <sup>20</sup>Irootari ocanque:

“Pamenavequempariqueti catsima-quempica taseanaque, pojoquitsitenempariquea isheca.

Irooca imire, pojoquitsitenempari-quea irimireta.

Pinquempetaquerogueti imaica ariquee incotanaquempa ovashiventajavaetanaqueri-quea,

onquempetanaquemparoquea pogataacotenerigueti ishinqui-reguishiqui quichagantemen-qui.”<sup>a</sup>

<sup>21</sup>Aatojate pishinetirotsi agavejimpitsija covaequisherentsi, manaquea panaana-queero, jeroquea panaantantanaquempa-roca pincavintsajacotantanaque.

**13** <sup>1</sup>Imaica noncantajiaquempi cameetsavaeque maasanojia-quea pinquemisantajiaquerija pimajiro-jiate. Ijamirincajiaque teequea inchi-qui-ojita impeajiguempaji intati pimajiro-jiate. Irguenti majirontacaacari Aapani Irioshi. <sup>2</sup>Jero quericaca catsimatashita-quemparineca imajironcaca pigatsata-quemparineca, incatsimaqueriquea Aapani Irioshi, teetari inquemisanteri-queate ipeacaavecaca imajirote. Iriatim-paquea quempetacaantanquitsineca.

<sup>3</sup>Irirajiaquea pimajirojiate teequea irooquea inchoocatashiteji iromintsaromintsarovaqueriquea comajamajian-quitsica, iroguentiquea ichoocatashiji-que iromintsaromintsarovaqueri peacaaguishetanquitsica covaequishe-rentsi. Teegueti pininteji iromintsaromintsarovaquempiquea pimajirojiate,

iroosacanica pinchoocajiguequeate cameetsa irishineventajiaquempinijite. <sup>4</sup>Irooguentitari ipeacamentajiacariquea Aapani Irioshi pimajirote irinetsanjia-quempiniji pinchoocatantajiaquempaca cameetsa. Oraquea aatogueti piquemi-santajiguiritsi, ariquee iroguenti pintsaroocaajiaquempariquea, teequea intati impeacaajiguempariji Aapani Irioshi pimajirojiate. Iroguentiquea ipeacaimencari incatsimajiaqueriquea peacaaguishetatsica covaequisherentsi.

<sup>5</sup>Irootaquequea noncantantajiaquem-pica pinquemisantamajaquerija pimajirojiate. Aatoquea aparo piquemi-santajiguiritsi aatoniji icatsimajiguim-pitsi, manaquea aisa pinquemisantajia-queri irooriji pitsajiaque inique Aapani Irioshi pinquemisantajiaqueriquea.

<sup>6</sup>Irootaquequea povegaratantacaroca icantajitica *impuesto* <sup>b</sup>pojocagarantanta-jiacanarica majirontatsica pimentaqui-tsipae, iroguentiquea isavicaventajia-que inintacaajiaquerica Aapani Irioshi irantajiaquea irimajironquempa.

<sup>7</sup>Povegarajigueri maasano paacotiri-gueti. Incanquegueti majirontatsica povegarataqueroquea icantajitica *tributo* <sup>c</sup>irooca *impuesto*, povegaraque-roquea pojocagarantajiaqueneriquea pimentaquitsite, aatoquea pipeacojiga-ritsi. Irirajia comajarijia, pinquenqueja-cameetsatocovaequeri, pinquenquetsata-coventaquerija cameetsa.

<sup>8</sup>Onchoocategueti paacotantegueti aatoja pipeacotantajigui, manaquea poguipiajeneri taampina paacoquea. Pincoguitempani pimpintsatavacaamaja-quempaquea. Aritarite quericaca

z 12.19 Ireo. 32.35. a 12.20 Tsa. 25.21-22. Pinquejetaquempagueti arica

incantashitatanquempa iraventanaquempari Aapani Irioshi irishetacotajeriniji.

b 13.6 *impuesto*. Oraquea icantajitica *impuesto*iroguenti icantaqueca majirontatsica irojocajiqueneri cameetsaniji irovegarataqueneri amitacojiaquerica quejecarica coareta, itsipajia netsanatiroca quenavoquirontsipae, maasano. c 13.7 *tributo*. Iroguenti quejevecaroca *impuesto*. (Pamenero otsapa 6.)

pintsamajacarica irapicaquintete, jac netsana inetsanaqueroquea icantacaantaqueca Aapani Irioshi itioncacotanaqueca Moishishini. <sup>9</sup>Icantajiquerotarite: “Pimpintsataquemparija pigonoro pinquejetacaajempa pipintsatagueti aviatimpa.” Iriraquea quempetiroca imaica inetsanaqueroquea itioncacoji-queca ocanti: “Aatoja picantatsatocantitsi, aatoja pimetojanti, aatoja paitsitantitsi, aatoja pitsojeventaritsija pigonoro, aatoja pinintsigueteritsija yashintajiacaca itsipa.” Aisa irinetsanatsigueteroqueroquea ogonoro quempeguetacaroca ocativa. <sup>d</sup> <sup>10</sup>Maasanoquea pintsamajatarica igonoro teequea querocaca incojiguerini. Irootaquequea nocantantacaca iriraquea pintsatantamajatatsica inetsanaqueroquea maasanopae itioncacotanqueca Moishishini.

<sup>11</sup>Imaica noncantajiaquempiquea pinquempejiaquempaquea imaica, pinquenquejacomajateroja savincaguiteripae achoocatantacaca. Aapojacaquea pintinajashirentantajianaquempaca, irooshipojitari incoraquetajate Amajirote irajajatajiqueate intsipatsipaitanajaji inquitequi. Oquempejitacotapojacaji imaica incoraquetantajempaca, anaqueroquea oquempejitacovetapojacajigueti iroaqueragueti atsaraventajiacarigueti. <sup>12</sup>Imaicaquea imaica achoocajiaquequea ocaniqui oncaviacagueti covaeguisherentsi iroguentica quempetata manaca amanquimanquitacovaequequea, cotanquitsiquea irooshipojaji incoraquetajate Amajirote. Oraquea incoraquetajategueti ariquea iroguenti onquempetaquemparoquea asavincaguietacojiguigueti, aatoqueate amenajajirotsi covaeguisherentsi. Irootaquequea imaica jaame ampishoncajianajerojate

maasanopae isenacajiguetica pitsecacotanquitsica, irooquea asavicaventajianaje inintaguetica Aapani Irioshi, onquempetaquempaquea anquitsaatajemparo aguishorijiate tsirencanquitsicaavaqueroneca covaeguishetacajine-meca. <sup>13</sup>Ancomajamajianaquempaqueate quejetaca savincaguitetacotajaji. Aatoja apeacaajisajiate taaca opajitapae ovashiventantaguetatsica. Aatoquea oimatitsi yomporoguijajiacagueti ipeacaaguishejiacarogueti tontarentsijencani covaeguisherentsi. Aatoja ashinquitatsi. Aatoja oashitirotsi manquigarentsi. Aatoja ationtajigatsi. Aatoja acatsimatavacaajigatsi, aisa aatoquea acatsimatacotsitiritsi itsipa. <sup>14</sup>Iriguentiquea pinquitsaatajempa Amajirote Jesoquirishito, aatoja piquenquejajiguetsi queroquea pincoqueroni pimpeacaaguishetaquemparogueti pinintaguishevecaca.

**Irirajia teemajaca intsateji quero  
ancojiaquempani aventamajacarigueti  
Quirishito**

**14** <sup>1</sup>Choocagueti papitsariventarijiate teemajaca intsateji quero ancojiaquempani aventamajacarigueti Quirishito, cotanquitsiquea ininquequea inconoajiaquempiquea ontaniqui picapiocajigagueti, aviatimpajia paajivaqueriqueate aatoja picantajiguiritsija: “Teemajacatarite pintsamajateji.” <sup>2</sup>Pamenejate iconoagarantajiacaquea icantajiaque cameetsavaeque ashecajiaquempaquea taaca opajitapae: iteshipae, maasano. Itsipa teemajacaca intsajigueji teequea irishecajiguempariji iteshi. <sup>3</sup>Iriraquea shecajiaccarica iteshi aatoquea icantajiguiritsi teeca irishecajiguempariji: “Teequea pintsateji.” Iriogueti teeca irishecatempariji aatoja icantajiguiritsi

shecajiacarica: “Manaquea pipeacaagui-shecaroquea covaeguisherentsi pishecatacarigueti iteshipae”, jac yashincari-quea Aapani Irioshi ipeaqueriquea irijanite. <sup>4</sup>¿Arimpate taampate aviatimpa cameetsaniji pincanqueriniji papitsarovertarite arigueti ichooaque cameetsa aricaca tee? Iriotari ashincari Amajirote. Inchiqiojita incanqueri iriatimpa, iriotaquequea amenamaja-queriquea quero icotacani. Cotanquitsi-quea inchooaque cameetsa, iragaveja-caaqueritari Amajirote.

<sup>5</sup>Oquempetaca aisa iconoagaranta-jiaca chooca cantajiatsica: “Chooa savincaguiteri caavijica anaaque oganejencavaeca, manaquea irisavica-ventajiquerojate irishineventajia-quemparinijite Aapani Irioshi.” Itsipapaequeate cantajianquitsica: “Ojamirincavaeque savincaguiteri ariquea oquempetavacaaca.” Cotanquitsiquea aviguentimpate aviatimpajia, apaniropae pinquenque-jamajajiaqueroquea quero pincojia-quempani cameetsaniji irishineventa-jiacquempinijite Amajirote. <sup>6</sup>Irraquea cantajiatsica chooca savincaguiteri caavijica anaaque oganejencavaeca, manaquea icanque imaica cameetsa-niji iroguipaquijateronijite yantavaequegueti irionijite irisavica-venquerinijite Aapani Irioshi irishine-venquempariquea. Ariqueate iquempetaca aisa shecajiacarica iteshi, ishecajiacari yamenajiaquetari irooquea ininquea Aapani Irioshi, jero icantacoguitani ishecajiacagueti ishineventajiacari Aapani Irioshi, yamanajiaqueri icanqueri: “Ariotesaa, Aapani.” Ariqueate iquempejiaca teeca irishecajiguempa-

riji iteshipae, yamenajiaque arica teeca irininteji Aapani Irioshi irishecajiaquempari. Aisa iriatimpajia icantacoguitani ishecajiacagueti ishineventajiacari Aapani Irioshi icantajiaqueri: “Ariotesaa, Aapani.” <sup>7</sup>Teequea anchoocatashijiguemparoji intati cameetsaniji antajiaqueroquea taaca opaji anintajiguica aatimpajia. Ariqueate onquempetaqueampa ametojajiaquegueti, aatoquea inchiqiojita ametojimentiro anintajia- guica aatimpajia. <sup>8</sup>Choocatirajaji- gueti, iroguentiquea achoocatashiji- aque antajiaqueroquea inintaguetica Amajirote. Oraquea ametojajiaque- gueti, manaquea oahoaitanaque iriatimpaqui antsipatsipaipojajem- pari. Ariqueate oquempetacaquea imaica, arica anchoocajiaque irooca ametojajiaquequea, icocani irashinta- jiajaji Amajirote. <sup>9</sup>Imetojaquititarite Quirishito ariquea ipochatanaji cameetsaniji impeaquempaquate Imajirojiate maasano tsaromentajia-rica, choocatajatsica iriguentijia aisa metojajianquitsica.

<sup>10</sup>Iroompaquea aviatimpaquea, <sup>e</sup> ¿quero ocotacani picantacotancarica papitsaroven- tarite incatsimatimentajiterinishiatsi iquejequerogueti imaica? Aviatimpampani aisa ¿quero ocotacani pitsojencancarica papitsarovertarite? Maasanoquea aatimpajia ancantintitimojiaqueriquea Aapani Irioshi oncoramanitapojajegu- eti incantajiacari aricaca atampaticamajajia- queroquea ininquea iriatimpa aricaca tee.

<sup>11</sup>Chooaquea tioncanquitsica ocanque:

“Icanque Amajirote: ‘Arimajaca nochooaque naatimpa, maasanoquea irogueroventajiaipoja- jena,

**e 14.10** Icanquegueti Paavoro *aviatimpaquea* iriguenti icanque teeca irishecatepariji iteshipae. Icanquegueti *aviatimpampani* manaquea ipitsocashitari itsipa shecatarica iteshi.

incantajiaquequea: Arimajacatarite  
aviguenti Irioshimajatatsica.’ ”<sup>f</sup>

<sup>12</sup>Irootaquequea atsatantajiacaca  
oncoramanitapojajegueti ironigaajiacajiro  
Aapani Irioshi maasano agoguishe-  
rejia, incoacotsitaji maasanojia  
apaniropae: “¿Quero ocoani piqueje-  
tancaca?”

**Aatojate ativashirentacagaritsi  
apitsariventarijiate**

<sup>13</sup>Irootaquequea ovashiantantanajem-  
paroca acantaguishetacotavacaavetaca-  
gueti. Manaquea pincantajigue:  
“Aatojate notivashirentiritsi napitsaro-  
ventarite, ocoquishetanaqueritsi.  
Aatojate noticaashirentiritsi.”

<sup>14</sup>Naatimpa notsaroventamajatacari-  
queate Amajirote Jesoshi notsamajatan-  
tacaca tee onchoocateji shecatsipae  
covaeguisheshirentacaantatsineca,  
cotanquitsiquea inchooquegueti  
quenquejanquitsineca: “Shoshoh  
ashecataritsi, icoguisheshirentacaanaca-  
jitsi”, aatoquea ishecataritsi. Irisheca-  
quemparigueti manaquea impeacaa-  
quempa covaeguisherentsi. <sup>15</sup>Arigueti  
pishimampojancacaacari papitsaroven-  
tarite pishecataquemparigueti iteshi  
icanqueca teequea oncameetsateji  
irishecajiquempariquea, oraquea  
pinquejetaquerogueti imaica, teequea  
pimpintsamajatepariji papitsaroven-  
tarite. Shoshoh picovaeguishetacagaritsi-  
jate iramenaquempigueti oo  
shecaquempi, ariquea incotanaquempa  
aato itsaroventajaritsi Quirishito.  
Iriguentitari imetojaventaqueca  
Quirishito. <sup>16</sup>Pamenaquegueti aviatimpa  
cameetsavaeque pishecataquempariquea  
iteshi, cotanquitsiquea choocagueti  
itsipapae papitsaroventarite cantanqui-  
sineca teequea oncameetsateji pisheca-

taquemparigueti, iroosacanica aatoquea  
pishecataritsi aviatimpa aatonijite  
icantitsi picovaeguisheca. <sup>17</sup>Ararite  
imajirontacagueti Aapani Irioshi  
teequea irooquea anaantamajatatsine  
ashecapae irooca amirepae. Jero  
anaantamajatanquitsica ancomajamaja-  
quempagueti, antsipatavacaquempa-  
quea cameetsa aisa aatoja ashoshoguete-  
tatsi, manaquea ashineshirentajiavae-  
quempa, irioquea agavejacaacajirone  
Ishire Aapani Irioshi. <sup>18</sup>Quericaca  
quempetemparineca imaica irantavente-  
nerigueti Quirishito, iriguenti  
ishinevenca Aapani Irioshi, ariquea  
inquempequempeitanaquempa  
caquinteja.

<sup>19</sup>Iroosacanica imaica jaameshiatsi  
ancomajamajajianaquempaquea  
cameetsaniji aatoniji acatsimatavacaaji-  
ajatsi, iroonijite amitacotavacaajia-  
quempaniji arimpaqueate antsaroven-  
majatanaquempariquea Aapani Irioshi.  
<sup>20</sup>Aatoja pipomatsitirotsi yantaqueca  
Aapani Irioshi ishirequi pigonoro  
pishecaquemparigueti icantimentanta-  
vetacaca papitsaroventarite. Cameetsa-  
veca pishecajiaquempariquea cantashi-  
tatiaguentanquitsica iteshipae, cotanqui-  
tsiquea oraquea pincovaeguishetacaa-  
quemparigueti papitsaroventarite  
pishecatacarigueti iteshi, ariquea  
iroguenti teequea oncameetsateji  
pishecataquemparigueti. <sup>21</sup>Cameetsama-  
jataque aatoja pishecataritsi iteshipae,  
irooca pimirarotsija quepishjaripae,  
irooca pantaguetaque taaca opajitapae  
pamenaquegueti ontivashirentacaana-  
quempari papitsaroventarite. <sup>22</sup>Oraquea  
pamenacagueti aviatimpa cameetsa-  
vaeque pishecataquempariquea iteshi,  
aatojate pisemetitsi picamantiritsi itsipa,  
iriguentiquea pincamanque Aapani

Irioshi. Cameetsavaeque iroquetitaja pinquenquejamajaqueroja taaca opaji cameetsatsica pimpeacaguempaca, ariquea pimpeacaquempargueti pishinevaequempaquee irooriji pintsaque teequea pincovaeguishetima-tempaji. <sup>23</sup>Cotanquitsiquea iriraquea teeca intsamajate aricaca cameetsavaeque irishecaquempariquea iteshi aricaca tee, ishecatacagueti iroguentiquea icovaeguisheca, ariqueate icanque: “Aricajate teecajate oncameetsateji noshecataquempargueti.” Aritarite taaca opaji antajiaque, arigueti ancantajiaque: “Aricajate teecajate oncameetsateji nompeacaaquemparoquea”, iroguentiquea acovaeguishesjiaca.

**Anquenquejacojiaqueri itsipajia**

**15** <sup>1</sup>Irootaquequea imaica aatimpajia tampishishirentajia-tsica cameetsavaeque antampishitacajai-aqueriquea apitsaromentarijiate teeca intampishishirentamajateji. Aatoja aparo aatimpa aquenquejacotajatsi anetsanajiaquero anintajiguica aatimpajia. <sup>2</sup>Anquenquejacotsijiguempariquea apitsaromentarijiate ancavintsajajiaqueri ashinetacaajiaquemparijate cameetsaniji arimpaquea intsaromentamajatanaquempariquea Aapani Irioshi. <sup>3</sup>Aritarite iquempetaca Quirishito, teequea irioquea quenquejacotajatsineca iriatimpa iranquequeate ininqueca iriatimpa, manaquea iquejetacari itioncacojiquea Tioncarentsimajacaqui, ocanquegueti: “Oraquea incantaguishetacojiaquempigueti, naroguentiquea otiavaetapojaca.”<sup>8</sup> <sup>4</sup>Maasanoquea Itioncacaantaqueca Aapani Irioshi manaquea itioncantajicaroca ontsatacaacaji, cameetsaniji antsipetacoguitempigueti ontampishishirentacaacaji

arimpaquea aguijacoshirentajiana-quempa irinetsanatanquemparoca maasanopae icanqueca paesatoniqui. <sup>5</sup>Iriotaquequea Aapani Irioshi agavejacaajiacaji antsipetacovaequempaquee, aisa irioquea shinetacaajiacajine. Noninquequea iragavejacaajiaquempiquea pintsipashirentavacaajiaquempa pinquejejiaquempargueti Quirishito Jesoshi, <sup>6</sup>cameetsanijite pintsipashirentavacaajiaquempa pishineventajiaquemparigueti Irioshite Amajirote Jesoquirishito, iriotaque aisa Iriri, pincantajiaque: “Caaviji yoganejencavaeca Aapani Irioshi.”

**Teeca irijorijoigueji itsavetantimojiqueri Quenquetsatsarensi Ogamejencatatsica**

<sup>7</sup>Irootaquequea imaica noncantantajiaquempica paavacaajiaquempajate, aritarite iquempetacaajiacaji Quirishito aatimpajia icavintsajajajaji yaavajaji. Iquempetacaajiacaji imaica cameetsaniji iramenajiquerinijite Aapani Irioshi caaviji yoganejencamajataca. <sup>8</sup>Imaica noncantajiaquempiquea, coramani icoraquetaquepatsiqui Quirishito Jesoshi ocaniqui quepatsiqui ichoocatimojiaquitiri nogonorojia joriojia yamitacojiaqueriquea cameetsaniji onetsanatementaquempaniji incantajiaquerica Aapani Irioshi coramani choviquijiaquenaca naatimpajia joriojia iroonijite intsamentajiquerinijite Aapani Irioshi teequea incantashitatiguemparoji icanqueca. <sup>9</sup>Icoraquetashijiaqueriquea aisa teeca irijorijoigueji cameetsaniji irishineventajiaquemparinijite Aapani Irioshi, incantajiaque: “Caaviji ipintsatacotantaca Aapani Irioshi.” Ocanquequea Tioncarentsimajaca:

“Irootaquequea noshineventantajia-  
quempica nontsipatsipaitaquem-  
pariguetei teeca irijorijoigueji,  
namashaiventajiaquempiquea.”<sup>h</sup>

<sup>10</sup>Aisa chooca otsipa itioncacojiquero-  
quea ocanque:

“Maasano teeca pijorijoigueji,  
ipishinejiaquempaja pintsipatsi-  
paitaquempariquea igaquinte-  
jiate Aapani Irioshi!”<sup>i</sup>

<sup>11</sup>Ariqueate chooca otsipa ocanque:

“Pishineventajiaquemparija  
Amajirote maasano teeca pijori-  
joigueji,  
maasanoqueate caquinteji pincan-  
tajiaqueri caaviji icavintsajanta-  
majati.”<sup>j</sup>

<sup>12</sup>Itioncaque aisa Isaiashini coramani  
icanque:

“Oncoramanitapojaque irivoaque  
aparo ichoviquini Isaini.  
Iriatimpa peanquitsineca oncorama-  
nitapojagueji Imajirojiate  
maasano caquintegetatsica.  
Irirajia teeca irijorijoigueji iroguija-  
cojiaquemparija incavintsajajia-  
queriquea.”<sup>k</sup>

<sup>13</sup>Iriaquea Aapani Irioshi iriotaquequea  
agavejacaajiacajica aguijacojiaquempa-  
gueti onetsanamajaquempa maasanopae  
icanqueca paesatoniqui inintacaitsicajica  
irishetacojiaqueca. Noninquequea  
iroguishinejiaquempiquea aatoniji taaca  
pishoshoguiteventatsija, paventaventaicari-  
tarite. Aisa noninque iragavejacaajiaquem-  
piquea Ishire Aapani Irioshi aatonijite  
piperataro poguijacoquempariguetei.

<sup>14</sup>Napitsarorentarijiate, imaica tsmajaja-  
taquenaquea picavintsajantamajataque,  
aisa pitsamajatanacuero maasanopae  
icanqueca Aapani Irioshi, pagavejamajaji-  
aque pincantomajavacaajiaquempa

cameetsa, aisa pintsatacaavacaajiaquempa  
cameetsa. <sup>15</sup>Cotanquitsiquea naatimpa  
teequea nontsarogueji nontioncaciaquem-  
piquea quempetaca imaica noquenqueja-  
caajiaquempiroquea nocamantajiaquem-  
pica coramani aatonijite pipeacojigarotsija.  
Notioncantajiaquempica imaica icavintsaj-  
aquenaqueate Aapani Irioshi, <sup>16</sup>inintaca-  
quenaquea Jesoquirishito nontsavetanti-  
mojiaqueriquea teeca irijorijoigueji,  
noquejetanacariquea saserorote nontsave-  
tantavaequero Quenquetsatsarentsi  
Oganejencatatsica itigarancaqueca Aapani  
Irioshi, cameetsanijite irinetsanashirenta-  
caajiaquempariguetei Ishire Aapani Irioshi  
iriraquea teeca irijorijoigueji, onquempe-  
taquempa irio namaquenerica Aapani  
Irioshi nojocapojaqueneri irishineventajia-  
vaquempariniji.

<sup>17</sup>Cameetsavaeque noshinevaequempa-  
quea namenaqueroguetei yantacaaquenaca  
Quirishito Jesoshi nantiniriguetei Aapani  
Irioshi. <sup>18</sup>Iroguenti nonquenquetsatacoque  
yagavejacaquenaquetei Quirishito nontsaro-  
ventacaajiacariquea teeca irijorijoigueji  
iquemisantantajiacarica Aapani Irioshi.  
Iquemajiaquenaqueate nontsavetantimojia-  
queriguetei, aisa yamenajiaquenaqueate  
quero nococani naatimpa. <sup>19</sup>Yagavejaca-  
quenaqueate Ishire Aapani Irioshi  
nonigaantantaqueroquea oacaantantatsica  
intati cameetsaniji intsajiqueroniijite  
arimajaca iriguentei tigarancaquenaquea  
Aapani Irioshi. Noquempetaca imaica  
nontsavetantavaequero Quenquetsatsarentsi  
Oganejencatatsica tsavetacoquerica  
Quirishito. Nopariapanajantaroquea  
Jerosarequi nontsitacaguitejavaetanaquero-  
queate oraniqui arejevaequemparoquea  
Iriricoqui. <sup>20</sup>Iroguenteiquea noninque  
nontsavetanteroguetei Quenquetsatsarentsi  
Oganejencatatsica nontsavetantimojiaque-

**h** 15.9 2 Sam. 22.50; Sar. 18.49. **i** 15.10 Ireo. 32.43. **j** 15.11 Sar. 117.1. **k** 15.12 Is. 11.10.

riquea irirajia tequerataca inquemacotima-  
teriji Quirishito aatonijite iriguenti  
nosavicaventajiguitsi nontsavetantimojia-  
queriquea irirajia itsavetantimojiquea.

<sup>21</sup>Iroguentiquea noninque onetsanamaja-  
quempa ocanqueca coramani Tioncarentsi-  
majaca ocanque:

“Inquemacojiaqueri teeca inquemaco-  
jiavetempariji,  
intsajianaque teeca inquemacotima-  
jiavetempariji.”<sup>21</sup>

**Paavoro inintaveca iroanaquemequeate  
Iromaquiniqui**

<sup>22</sup>Notsavetacotimojiaquerigueti  
itsipapae, irooquea tempajacaquenaca,  
nonintagueveca noanaquemequeate  
namenajijatempimequeate. <sup>23</sup>Cotanqui-  
tsiquea imaica notsitacajiaqueriqueate  
notsavetantimojiaqueriquea guintenijia-  
tsica ocانىqui. Nococaniquea nopintsata-  
taca namenajijatempiquea. <sup>24</sup>Ariqueate  
noanaquegueti Esepañaqui noninque  
narejetimotapanajantempi. Aapojempa-  
gueti noncoraquequegueti orانىqui  
namenajapanajantempiquea noshine-  
vaequempa noncanquempa amenava-  
caajiaquempaquate. Iroompaquea  
navisanaquegueti Esepañaqui noninque  
povoquijiaquitenaqueate, arica pagave-  
jajigue pojocajiaquenaqueate  
nocoguitejacovaecaca.

<sup>25</sup>Cotanquitsiquea imaica iroqueti-  
quea narejetapanajantempaquea  
Jerosarequi, namitacojiaqueri  
apitsarorentarijiate guintenijia-tsica  
ontانىqui. <sup>26</sup>Icapiocajiaqueneritari  
Maseroniaquitica aisa Acayaquitica  
imentaquipae itigarancacaantajiaque-  
neriquea apitsarorentarijiate coguite-  
jacovaetanquitsica guintenijia-tsica  
ontانىqui Jerosarequi. <sup>27</sup>Iriatimpajia  
teetari irio joriojia cotanquitsiquea

iquenquejacojiaqueriquea iramitacoji-  
aqueri joriojia tsarorentajia-tsica,  
yamenajiaqueriqueate irioquea  
joriojia tsavetantimojiaqueri icaman-  
queriquea quero incojiaquempañi  
irishetacojiaquerigueti. Inintantajiana-  
caca iraaqarantajiaquequea yashinta-  
jiacaca iriatimpajia itigarancacaan-  
tajiaqueneriquea. <sup>28</sup>Irootaquequea  
imaica noantanaquempaca Jerosa-  
requi nojocajiaapanajantenerija,  
iroompaquea nontempajantanajem-  
paro Esepaña, ariqueate namenajia-  
panajantempiquea pichoocajiaquegueti.  
<sup>29</sup>Notsamajaquequea noncoraqueque-  
gueti orانىqui incavintsajamajaque-  
naquea Quirishito iragavejacaquena-  
queate nontsavetantimojiaquemp-  
iqueate cameetsaniji ashinejiaquempa-  
niji.

<sup>30</sup>Napitsarorentarijiate, aviatimpajia  
pitsarorentajiacari Amajirote Jesoquiri-  
shito, aisa yagavejacaajiaquempiquea  
Ishire Aapani Irioshi pipintsajiaquena-  
quea. Noncantantajiaquempica imaica  
nonintamajataque pamanacoventajia-  
quenajate. <sup>31</sup>Pincantajiaqueriquea  
Aapani Irioshi irompetaquenaqueate  
aatonijite queroica icojianatsi Joreaqi-  
tica teeca intsarorentajiguempariji, aisa  
cameetsanijite irajiaquenerinijite  
imentaqui namajiaquenerica apitsaro-  
ventarijiate Jerosarequitica, <sup>32</sup>cameetsa-  
niji iroompaquea iriogueti nintanquitsi-  
neca Aapani Irioshi narejevaequempa-  
quea orانىqui noshinevaequempaquea  
namenajiaquempigueti, ariqueate  
ashinetacaavacaajiaquempaquea.  
<sup>33</sup>Imaicaquea noninque maasano  
aviatimpajia quisho iroarointanaquemp  
Aapani Irioshi, iriguentitari choocata-  
caajiacajica cameetsa aatoniji ashoshoguiteta. Ari oncoquempa.

**Paavoro iquenquejacojiaqueri  
irapitsaroveritarijiate guintenijiaatsica  
Iromaqui**

**16** <sup>1</sup>Aricaca pamenajiavaqueroquea oratica apitsarovertarote Peve arejetaquempagueti oraniqui. Iroatimpa iroguenti amitacopinijiguirica tsarovertajiatsica capiocapinijiaatsica Senquereaqui. <sup>2</sup>Cameetsaja paajiavaquerojate ariqueate oquempejiaquempiquea aviatimpajia otsaroverncarigueti Amajirote. Pinetsanjia-vaqueroja, aviguentijiatarite tsaroverntamajiaatsica. Pamitacojiaqueroqueate, aisa pojocajiaqueneroquea taaca opaji oncoguitejacoquempacaca. Ariqueate oquempetaca iroatimpa amitacotantavaeque, amitacotanaquenaqueate naatimpa aisa.

<sup>3</sup>Pincantajiaqueroquea Pirishira<sup>m</sup> aisa irira Aquira noquenquejajiaqueri cameetsaca ichoocajiaque. Iriguentijia notsipatashijiacaca coramani nantavaequenerigueti Quirishito Jesoshi. <sup>4</sup>Ipajia-vetancaroquea imetojane aatonijite naroguenti metojatsi, irootaquequea imaica noshineventantajiacarica nocanca, cotanquitsiquea teequea aparo naatimpa noshineventajiaquempari ishineventajiacariquea aisa maasano tsaroverntajiaatsica teeca irijorijoigueji capiocapinijiaatsica osamanipaequitica.

<sup>5</sup>Pincantajiaqueri aisa noquenquejajiaqueriquea apitsaroveritarijiate capiocapinijiaatsica itsovironaquitequi. Noquenquejaqueri aisa nopintsatacaca Epeneto iriquestica tsaroverncari Quirishito ontaniqui Ashiaqui.

<sup>6</sup>Pincantajiaqueroja aisa Maria noquenquejajiro, namenaquequea antavaeque amitacojiaquempiquea aviatimpajia.

<sup>7</sup>Noquenquejajiaqueri nogonorojia Anteronico aisa Joniashi itsipatacaantaji-

quenaca coramani isantanatacojitaquena-gueti. Iriatimpajia iriquestica tsaroverncari Quirishito tequeratagueti nontsaroverntempariji naatimpa. Maasano itigarancanejia Quirishito ipintsamajajiacariqueate icancani ishineventamajatacari.

<sup>8</sup>Pincantajiaqueriquea aisa Ampiriato noquenquejaqueri, iriguenti napitsaroverntarite nopintsamajacari.

<sup>9</sup>Noquenquejaqueri aisa Orovaano, notsipatashijiacaca coramani nantavaejiaquenerigueti Quirishito Jesoshi. Noquenquejaqueri aisa nopintsamajatacaca Esetaqui.

<sup>10</sup>Noquenquejaqueri aisa Apereshi. Iriatimpa yatsipevaeca cotanquitsiquea arimpaquea itampishitanaquequea itsaroverntancari Quirishito. Iriguentijia aisa choocatimojiaacarica Arishitovoro noquenquejaqueri.

<sup>11</sup>Pincantajiaquerija aisa Eroriono noquenquejaqueri, iriguenti nogonoro. Iriguentijia aisa choocatimojiaquerica Narishiso tsaroverntajiacarica Amajirote pincantajiaquerija noquenquejaqueri.

<sup>12</sup>Noquenquejaquero aisa Tiripena aisa Tiriposa antajiguinirica Amajirote. Noquenquejaquero aisa Perishira apintsamajajiacaca. Ariquea oquempetaca iroatimpa antavaequeneri Amajirote.

<sup>13</sup>Pincantajiaqueri aisa Iropo icoguiaqueca Amajirote noquenquejaqueri. Ariquea oquempetaca iriniro iroatimpa noquenquejamajaqueroquea, oquempetacaamajaquenaquea naroguentica ashimajaca irijanite.

<sup>14</sup>Pincantajiaqueri noquenquejajiaqueri aisa Ashinquirito, Peregonte, Eremeshi, Paterova, Eremashi, iriguentijia aisa apitsaroverntarijiate tsipajiacarica.

<sup>15</sup>Noquenquejajiaqueri aisa Pirorogo aisa Joria, iriguenti aisa Nereo aisa

---

**m 16.3** *Pirishira* aisa opajita Pirishica. Pamenero 2 Ti. 4.19.



itsijoite. Noquenquejaqueri aisa Orimpashi iriguentijia aisa maasano apitsarorentarijiate tsipajiacarica.

<sup>16</sup>Netsana pinintavorotavacaavaquempa.<sup>n</sup> Maasanoquea tsarorentajiacarica Quirishito capiocapinijiatsica inintajiaque pinquemacojiaqueriquea choocajia iquenquejajiaquempiquea.

<sup>17</sup>Imaica napitsarorentarijiate, noncantajiaquempi shoshoh yamatavijajiguimpitsijate itsipa tsatacaantajiguiroca teeca onquemparoji notsatacaajiaquempica naatimpa aisa itsipajia tsavetacotantajiaquerica Quirishito. Pinquemisantajiaquerigueti iriatimpajia ariquea pincojianaquempa quea pincatsimatavacaajiaquempa quea iroompaquea pintsinampirejavacaajianaquempa aatoquea pitsipatavacajatsi.

Aatoja piconoajigaritsija. <sup>18</sup>Iriatimpajia teequea irioquea irantajigueneji Amajirote Jesoquirishito, iroguenti isavicaventajigui taaca opaji inintajiguica iriatimpajia. Iquenquetsavijitanaque cameetsaja itampaticamajaveca ariquea yamatavimatavaequeri teeca intsamajajigueji.

<sup>19</sup>Maasanoquea iquemacojiaquempi piquemisantamajataque, irootaquequea noshineventantajiaquempica, cotanquitsiquea noninque pintsamajajiaquequea cameetsaniji ponigaantajiaqueronijite inintaguetica Aapani Irioshi. Oraquea taaca opaji covaeguisherentsi irooquea iroguenti aatoja piquenquejajiguitsijate.

<sup>20</sup>Pinquempejiaquempagueti imaica, iriraquea Aapani Irioshi choocatacaajiajajica cameetsa caarica ashoshoguitetanta incatimsitempiquea iragavejacaajiaquempi pagavejajiaquerinijite Satanashi, onquemparaquempa pagaticanaqueri impotsocanaque. Imaica noninque incavintsajavaequempiquea Amajirote Jesoquirishito.

<sup>21</sup>Irraquea Timoteo notsipatashitaca nantinirigueti Amajirote ininque pinquemacojiajeri iquenquejajiaquempi. Ariquea iquempejiaca nogonorojia Iroshio, Jasoni aisa Soshipatero iquenquejajiaquempi.

<sup>22</sup>Ariquea noquempetaca naatimpa noquenquejajiaquempi. Naroguenti papitsarorentarijiate nopajitaca Tereshio. Naroguenti tioncavaqueneriquea Paavoro icanqueca ocaniqui paperiqui.

<sup>23</sup>Iquenquejajiaquempi aisa Gayo nomaimoqueca, iriotaquequea imaimojiguica maasano tsarorentajiaatsica avisavisaitatsica ocaniqui. Ariquea iquempetaca Erashito iriatimpa iquenquejajiaquempi. Iriguenti *tesorero* amitacotirica majirontatsica guintenintisiqui, inetsanaguetaqueneri imentaqui icapioajiguica guintenijiaatsica ocaniqui ashi irinetsanatantaquemparoca iriguinteninitantajiaquempaca. Aisa apitsarorentarijiate Coareto ininque pinquemacojiaqueri iquenquejajiaquempiquea.

<sup>24</sup>Imaica, napitsarorentarijiate, noninque incavintsajamaquempiquea Amajirote Jesoquirishito. Ari oncoquempa.

#### Ashineventajiaquempari Aapani Irioshi

<sup>25</sup>Imaicaquea imaica jame ashineventajiaquempari Aapani Irioshi, iriotaquequea agavejanquitsineca intampishitacaantajiaquempiroquea Quenquetsatsarensi Oganejencatsica camantajiacajica quero icotani iriatimpa ishetacotantigueti. Irootaquequea notsavetantica naatimpa notsavetantirigueti Jesoquirishito. Aisa irootaquequea yonigaimojiacajica Aapani Irioshi imaica. Iriatimpa icocani inintaco-

---

**n 16.16** *Netsana pinintavorotavacaavaquempa.* Yamejiaca coramani inintavorotavacaajivaca yamenavacaajiacagueti, ari iquejejiaca tsarorentajigarica Quirishito coramani.

tsijiacaji coramani irishetacojiacaji,  
 cotanquitsiquea teequea intsajivetemparoji.  
<sup>26</sup>Imaicaquea imaica jeroquea itsatantaji-  
 caroca, onigaacajiroquea itioncacojiana-  
 queca coramani tsavetantajiatsica,  
 iriotaquequea cantanquitsica Aapani  
 Irioshi onquempetaquempaquee imaica.  
 Iriatimpa icoguitani ichoocaguitini  
 coramani tequeratagueti onchoocagueteji,  
 aisa incoguitempani inchoocaguiteni.  
 Icanque onquempetaquempaquee imaica

cameetsanijite onsitacaguitejavaetana-  
 quemparoniji jmm inquemajiaquenijite  
 maasano caquinteguetatsica, cameetsaniji  
 incaramirincajiaque iraventaventaquem-  
 pari inquemisantajiaqueriquea. <sup>27</sup>Iroosaca-  
 nica imaica iintsijate incoquempani  
 irishineventajiaquempari Aapani Irioshi,  
 aparo icota iriatimpa itsamajati, irioquea  
 Jesoquirishito amenacaajiaquerineca  
 maasano arimajaca caaviji yanaaque  
 yoganejencamajatata. Ari oncoquempa.